



# PHOOLO YA SETŠHABA

## MANGWALO A MAKGETHWA

Mangwalo a makgethwa go tšwa go buka ya  
Dithapelo tša Phoolo ya Setšhaba ka mongwadi Linda Gobodo

---

## LETŠATŠI LA 1

### **Tshepo: Hosea 2:15**

<sup>15</sup>Ke tla mmušetša dirapa tšela tša gagwe tša merara, gomme Moedi wa Matshwenyego ka o dira felo ga kholofelo. Moo o tla kwana le nna bjalo ka mola e sa le yo mofsa, mola a etšwa Egepeta.

### **Phodišo: Malakia 4:2**

<sup>3</sup>Eupša ge e le lena ba le mpoifago ke tla tla go le phološa bjalo ka letšatši ge le hlaba, ka le fodiša bjalo ka mahlatedi a lona. Le tla lokologa la kganakgana bjalo ka manamane a a buletšwego.

### **Pušeletšo: Hesechiele 36:25-28**

<sup>25</sup>Ke tla le fokela ka meetse a a sekilego, ka le hlwekiša go tšhilafatšwa ke medingwana yohle ya lena, le tše dingwe ka moka tše di le tšhilafaditšego. <sup>26</sup>Ke tla le fa dipelo tše mpsha le menagano ye mefsa. Ke tla le amoga dipelo tša lena tše thata ka le fa dipelo tše boleta. <sup>27</sup>Ke tla le tsenya moya wa ka, mme ka dira gore le phethe melao ya ka le ditaelo tša ka ka potego. <sup>28</sup>Ke mo le tlogo dula nageng ye ke e filego borakgolokhukhu ba lena. Le tla ba setšhaba sa ka, mme nna ka ba Modimo wa lena.

## LETŠATŠI LA BO 2

### **Tshepo: Dipesalome 126:1-3**

<sup>1</sup>Mola Morena a re bušetša Sione re etšwa bothopša, e be nke re a lora. <sup>2</sup>Re be re sega re gobela; ke ge baditšhaba ba re: “Morena o ba diretše tše dikgolo.” <sup>3</sup>Le bjale, Morena o re diretše tše dikgolo, gomme ra thakgala.

### **Phodišo: Lukase 10:8-9**

<sup>8</sup>Ge le ka re le tsena motseng la amogelwa, le je se ba le fago sona, <sup>9</sup>le fodiše balwetši ba gona mme le botše batho ba moo le re: ‘Nako ya gore Modimo a le buše e batametše.

### **Pušeletšo: Joboo 22:27-30**

<sup>27</sup>Ge o mo rapela o tla go kwa, wena o tla kgona go phetha dikeno tša gago. <sup>28</sup>Ge o ikemišeditše go dira selo, o tla se kgona; tsela ya gago e tla bonegelwa ke seetša. <sup>29</sup>Ge Modimo a kokobetša bakgopo, wena o tla re ke ka lebaka la boikgantšho bja bona; baikokobetši bona o a ba phološa. <sup>30</sup>Modimo o tla hlakodiša yo a se nago molato, gomme wena o tla go hlakodiša ge o dira tše di lokilego.”

## LETŠATŠI LA BO 3

### **Tshepo: Dillo 3:26**

<sup>26</sup>“Ke mo gobotse ge motho a letela go imollwa ke Morena a sa fele pelo.”

### **Phodišo: Jeremia 32:27**

<sup>27</sup>“Ke nna Morena, Modimo wa batho ka moka. Kgane go na le se se ntšhitago?”

### **Pušeletšo: Rute 4:15**

<sup>15</sup>Ngwetši ya gago e a go rata, mme go wena e phala le barwa ba motho ba ba šupago. Bjale o go belegetše setlogolo sa go go hlogiša lefsa, le go go fepa ge o tšofetše.”

## LETŠATŠI LA BO 4

### **Tshepo: Baroma 12:12**

<sup>12</sup>“Le thakgatšwe ke kholofelo ye le nago le yona; ge le na le matshwenyego le se a felele pelo; le dule le rapela.”

### **Phodišo: Jeremia 17:14**

<sup>14</sup>“O Morena, mphodiše, gomme ke tla fola; mphološe, gomme ke tla phologa. Ke wena ke go retago!”

### **Pušeletšo: Johanese 14:13–14**

<sup>13</sup>“Gomme se le kago nkgopela sona le le ba ka, ke tla se dira, gore batho ba bone letago la Tate ka nna, Morwagwe. <sup>14</sup>Ge le nkgopela selo ka ge le le ba ka, ke tla se phetha.”

## LETŠATŠI LA BO 5

### **Tshepo: Baroma 15:13**

<sup>13</sup>“Anke Modimo yo a le fago kholofelo a dire gore ka ge le mo dumetše, le be le lethabo le khutšo ka botlalo, gore kholofelo ya lena e fele e oketšwa ke Moya wo Mokgethwa ka maatla a wona.”

### **Phodišo: Jakobose 5:16**

<sup>16</sup>“Ka gona, le ipolele dibe seng sa lena gomme le rapelelaneng, gore le tle le fodišwe. Thapelo ya moloki e na le maatla a magolo.”

## **Pušeletšo: Jeremia 33:9**

<sup>9</sup>“Jerusalema e tla ba felo mo go nthabišago le mo ke retwago gona, le mo ke ikgantšhago ka gona, gomme seo se tla tsebja ke ditšhaba tšohle tša lefase; di tla boifa tša thothomela ge di ekwa ka tšohle tše dibotse tše ke di direlago batho ba Jerusalema, le ka katlego ye ke e tlišetšago motse wo.”

## **LETŠATŠI LA BO 6**

### **Tshepo: Jeremia 29:11**

<sup>11</sup>“Ke nna fela ke tsebago merero ye ke le reretšego yona, merero ya katlego, e sego ya tahlego, merero ya bokamoso bjo bo holofetšago.”

### **Phodišo: 1 Petrose 2:24**

<sup>24</sup>“Kriste o ithwešitše dibe tša rena, a fegwa le tšona sefapanong gore re tle re tlogele sebe gomme re phelele go phetha thato ya Modimo. Le lena le fodišitšwe ka dintho tša gagwe.”

### **Pušeletšo: Jesaya 41:10**

<sup>10</sup>“Le se ke la boifa –ke na le lena! Le se ke la lealea – ke nna Modimo wa lena! Ke a le tiiša, ke a le thuša, ke a le šireletša, ke le hlakodiša ka maatla a ka.”

## **LETŠATŠI LA BO 7**

### **Tshepo: 1 Bathesalonika 2:19**

<sup>19</sup>“Gobane ke mang yo a re fago lehutšo le thabo, yo a re kgontšhago go kgantšha go fenyga ga rena mo pele ga Morena wa rena, Jesu Kriste, mohla a etla, ge e se lena?”

### **Phodišo: Jesaya 53:5**

<sup>5</sup>“Eupša o hlabilwe ka lebaka la dibe tša rena, a otlwa ka lebaka la makgopo a rena. Rena re ile ra boelanywa le Modimo ka go otlwa moo ga gagwe, ra fodišwa ke dintho tša gagwe.”

### **Pušeletšo: Jeremia 31:18-19**

<sup>18</sup>“Re ile ra go furala, eupša ra ba ra itshola. Ka morago ga ge o re lemošitše bošaedi bja rena, re ile ra inamiša difahlego ka dihlong. Re be re inyatša re hlabja ke dihlong, ka gobane re dirile dibe re sa le bana.”

## LETŠATŠI LA BO 8

### **Tshepo: Doiteronomio 31:6**

<sup>6</sup>“Le beng le sebete, le tie. Le se ke la ba boifa, gobane Morena Modimo wa lena o tla ba le lena. A ka se le lahle goba a le tlogela.”

### **Phodišo: Mateu 8:1-4**

<sup>1</sup>“Ge Jesu a theoga thabeng, lešaba le legolo le ile la mo latela. <sup>2</sup>Gwa nama gwa tla monna yo mongwe go yena a swerwe ke bolwetši bja letlalo bja go mo tšhilafatša, a khunama pele ga gagwe a re: “Morena, etse ge o rata o ka mphodiša ka hlweka!”<sup>3</sup>Jesu a otlolla letsogo a mo kgwatha a re: “Ke a rata; hlweka!” Gateetee monna yola a fola. <sup>4</sup>Ke moka Jesu a re go yena: “O se ke wa botša motho, eupša o ye go moprista a go bone, gomme o dire sehlabelo se se laetšwego ke Moshe, e be bohlatse go batho bja gore o hlwekile.”

### **Pušetšo: Doiteronomio 30:3-5**

<sup>3</sup>“gona Morena Modimo wa lena o tla le šokela. O tla le buša ditšhabeng tšeo a le šwalalanyeditšego go tšona, mme a le atlegiša gape. <sup>4</sup>Le ge le ka šwalalanyetšwa mafelong a lefase, Morena Modimo wa lena o tla le kgobokanya gona moo mme a le buša, <sup>5</sup>gore le tle le tšee naga ye borakgolokhukhu ba lena ba kilego ba e thopa. Gomme o tla le atlegiša a ba a le atiša go feta ka moo borakgolokhukhu ba lena ba kilego ba ba ka gona.”

## LETŠATŠI LA BO 9

### **Tshepo: Jesaya 40:31**

<sup>31</sup>But Eupša bao ba tshephilego Morena ba tla lapologa, ba se sa felelwa ke maatla, ba swana le dintšhu tše di akalalago. Ba tla kitima ba se lape, ba sepela ba sa fele maatla.

### **Phodišo: Dipesalome 103:2-4**

<sup>2</sup>“A ke rete Morena, ke se lebale tše a ntirelago tšona: <sup>3</sup>O ntebalela makgopo a ka ka moka; o mphodiša malwetši a ka ohle. <sup>4</sup>O ntlhakodiša lehung; o a ntlhompha, a nthata, a ntšhokela.

### **Pušetšo: Johanese 10:10**

<sup>10</sup>“Lehodu lona le tlela go utswa le go bolaya le go lobiša. Nna ke tletše gore dinku tša ka di phele – di phele bophelo bjo bo feletšego.”

## LETŠATŠI LA BO 10

### **Tshepo: 1 Bakorinte 13:6-7**

<sup>6</sup>Ga a thabele bobbe, o thabela toka. <sup>7</sup>O kgotlelela tšohle, o dumela tšohle, o holofela tšohle, o pelotelele go tšohle.

### **Phodišo: Jakobose 5:14**

<sup>14</sup>Ge yo mongwe wa lena a lwala, a bitše bagolo ba phuthago ba tle ba mo rapelele, ba mo tlotše ka makhura a mohlware, ka ge ba laetšwe ke Morena.

### **Pušeletšo: Jeremia 32:14-15**

<sup>14</sup>“Morena Ramaatlaohle, Modimo wa Israele, o go laela gore o tšee mangwalo a a theko, la go kibja le la go se kibje, o a bee ka sebjaneng sa letsopa gore a tle a lotege nako ye telele. <sup>15</sup>Morena Ramaatlaohle, Modimo wa Israele, o re dintlo le mašemo le dirapa tša merara di tla buša tša rekwa mo nageng ye.”

## LETŠATŠI LA BO 11

### **Tshepo: Dipesalome 39:7**

<sup>7</sup>Bjale nna ke sa lebeletšeng, Mong wa ka? Yo ke mo holofetšego ke wena.

### **Phodišo: Mateu 9:4-8**

<sup>4</sup>Jesu a lemoga se ba se gopolago, mme a re: “Le reng le gopola dilo tše mpe ka dipelong tša lena? <sup>5</sup>Se bonolo ke eng, go re: ‘O lebaletšwe dibe,’ goba go re: ‘Emelela o sepele?’ <sup>6</sup>Bjale ge, ke tla le laetša gore Morwamotho o na le maatla lefaseng a go lebalela batho dibe.” Ke ge a re go monna yoo wa go repha ditho: “Emelela, o tšee legogwa la gago, o ikele gae!” <sup>7</sup>Monna yola a emelela, a ya gae. <sup>8</sup>Ge lešaba le bona seo, la boifa gomme la tumiša Modimo ka ge a file batho maatla a makaaka.

### **Pušeletšo: Dipesalome 71:20-21**

<sup>20</sup>O ntlīšeditše ditlaišego tše dintši tše bohloko, fela o tla buša wa mmaatlafatša, wa mphološa lehung. <sup>21</sup>O tla mpušetša maamong a bohlomphegi, gomme wa nkhomotša gape.

## LETŠATŠI LA BO 12

### **Tshepo: Markose 9:22-24**

<sup>22</sup>Ke gantši moya wo mobe o mo lahlela ka mollong le ka meetseng, o nyaka go mmolaya. Ge o kgona, re šokele, o re thuše!” <sup>23</sup>Jesu a mo fetola a re: “O re ‘ge o kgona?’ Gape tšohle di a kgonega go yo a nago le tumelo.”

## Phodišo: 3 Johanese 1:2

<sup>2</sup>E sa le a eba go Modimo go tloga le go tloga.

## Pušeletšo: Jeremia 30:1-3

<sup>1</sup>Morena Modimo wa Israele o rile go Jeremia: “Tšohle tše ke go boditšego tšona di ngwale ka pukung, 3ka gobane nako e etla ya gore ke tle ke kgoboketše setšhaba sa ka, sa Israele le sa Juda, ditšhaba tšeo di lego bothopša. Ke tla ba bušetša nageng ye ke e filego borakgolokhukhu ba bona, gomme ba tla e tšea gape ya ba ya bona. Ke realo, nna, Morena.”

## LETŠATŠI LA BO 13

### Tshepo: Diema 10:24

<sup>24</sup>The Se yo kgopo a se tšhabago ke sona se mo welago, baloki bona ba fiwa tše ba di nyakago. <sup>25</sup>Ge ledimo le feta, le feta le yo kgopo, moloki yena ga le mo dire selo.

## Phodišo: Dipesalome 73:26

<sup>26</sup>Le ge nka palelwa mmeleng le moyeng, Modimo yena ke maatla a ka; ke wa ka go ya go ile.

## Pušeletšo: Bafilipi 4:19

<sup>19</sup>Gomme Modimo wa ka o tla le fa tšohle tše le di hlokago, go ya ka lehumo le legolo le a nago le lona ka Kriste Jesu.

## LETŠATŠI LA BO 14

### Tshepo: Diema 23:18

<sup>18</sup>Ge go ka ba bjalo, gona bokamoso bja gago bo tla kgahliša, le kholofelo ya gago e ka se be ya lefeela.

## Phodišo: Dipesalome 147:3

<sup>3</sup>O homotša ba ba nyamilego, o ba kgothatša manyaming a bona.

## Pušeletšo: Joele 2:25-26

<sup>25</sup>The Ke tla le bušetša dibjalo tšela le di lobilego mengwageng yela bojane le segongwane le manale le maphatakalala di di llogo. Ke nna ke bego ke le rometše madira ao a tšie. <sup>26</sup>Le tlišo ba le dijo tše dintši la khora. Le tla reta Morena Modimo wa lena yo a le diretšego dimakatšo. Setšhaba sa ka se ka se sa tsoga se llwe ke dihlong.

## LETŠATŠI LA BO 15

### **Tshepo: Baroma 8:24-25**

<sup>24</sup>Gobane re phološitšwe ka ge re be re holofetše; fela ge se re bego re se holofetše re se bona, ga e sa le kholofelo, gobane ga go motho yo a ka holofelago se a se bonago.

<sup>25</sup>Eupša ka ge se re se holofelago e le se re sa se bonego re se letela re sa fele pelo.

### **Phodišo: Mateu 10:1**

<sup>1</sup>Jesu a bitša barutiwa ba gagwe ba lesome le metšo ye mebedi, a ba fa maatla a go leleka meoya ye mebe le a go fodiša batho malwetši le mafokodi a bona.

### **Pušeletšo: Dipesalome 51:12**

<sup>12</sup>Buša o mphe lethabo la motho yo o mo phološitšego, mme o dire gore ke rate go go theeletša.

## LETŠATŠI LA BO 16

### **Tshepo: Jeremia 17:7**

<sup>7</sup>“Go lehlogonolo yo a botilego nna, Morena, yo a ithekgilego ka nna.

### **Phodišo: Diema 17:22**

<sup>22</sup>Motho wa go thakgala ke yo a phetšego gabotse; wa go nolega moko yena ga a na maatla.

### **Pušeletšo: Sakaria 1:17**

<sup>17</sup>“Morongwa yoo a mpotša le gore ke bege ke re: “Morena Ramaatlaohle o re metse ya gagwe e tla buša ya atlega kudu, le gona o tla buša a homotša badudi ba motse wa Jerusalema, gomme a o dira bodulo bja gagwe gape.”

## LETŠATŠI LA BO 17

### **Tshepo: Diema 10:28**

<sup>28</sup>Se baloki ba se holofetšego ke lethabo, se bakgopo ba se holofetšego sona ga se tšwelele.

### **Phodišo: Mateu 10:8**

<sup>8</sup>Le fodiše balwetši, le tsoše bahu, le fodiše le ba ba swerwego ke malwetši a letlalo a a ba tšhilafatšago gore ba hlweke, le be le lelekeng le bademone. Le filwe fela, le lena le feng fela.



## **Pušeletšo: Ditiro 3:19-21**

<sup>19</sup>Ka gona, itsholeng le sokologe gore le phumolwe dibe tša lena, <sup>20</sup>gore Morena a le lapološe, a le romele Jesu, yena Kriste yo a šetšego a mo kgethetše lena. <sup>21</sup>O swanetše go ba a dutše kua legodimong go fihlela ge dilo tšohle di tlilo bušetšwa sekeng sa tšona, bjalo ka ge Modimo a begile ka baprofeta ba gagwe ba bakgethwa ba ba phetšego kgalekgale.

## **LETŠATŠI LA BO 18**

### **Tshepo: Dipesalome 71:14**

<sup>14</sup>Nnaena ke tla dula ke tshephile wena; ke tla go tumiša ke ntše ke eya.

### **Phodišo: Doiteronomio 7:15**

<sup>15</sup>Morena o tla thibela malwetši ka moka go lena. A ka se le wišetše malwetši ale a mašoro le a bonego Egepeta, eupša o tla a wišetša manaba ka moka a lena.

### **Pušeletšo: Jobo 42:10**

<sup>10</sup>Ge Jobo a rapeletše bagwera bao ba gagwe ka bararo, Morena a mo atla gape, gomme a mo fa thoto ya go lekana le yela ya pele ge e balwa gabedi.

## **LETŠATŠI LA BO 19**

### **Tshepo: Diema 13:12**

<sup>12</sup>Seletelwa se se sa phethagalego se a nyamiša, senyakwa se motho a se hwetšago sona se a thabiša.

### **Phodišo: Jeremia 30:17**

<sup>17</sup>Ke tla le fodiša dintho, ka le bušetša sekeng, le ge le bitšwa ‘Molahlwane’, ‘Sione mohlokamošetši’. Ke realo, nna, Morena.”

### **Pušeletšo: 1 Johanese 5:4**

<sup>4</sup>Gobane ngwana yo mongwe le yo mongwe wa Modimo o fenya lefase. Gomme se re fenyago lefase ka sona ke tumelo ya rena.

## **LETŠATŠI LA BO 20**

### **Tshepo: Baheberu 11:1**

<sup>1</sup>Tumelo ke bonnete bja tše re holofelago gore di tla hlaga, ke go kgolwa tše re sa di bonego. <sup>2</sup>Gobane ke ka tumelo mo batho ba kgale ba bego ba kgahla Modimo.

## Phodišo: Ditiro 4:30

<sup>30</sup>Otlolla letsogo la gago o fodiše batho, gomme mehlolo le dika di dirwe ge go bitšwa leina la Jesu, mohlanka wa gago yo mokgethwa.”

## Pušeletšo: Markose 11:24

<sup>24</sup>Ka lebaka leo ke le botša gore tšohle tše le kago di kgopela ka thapelo, le dumele gore ruri le tla di fiwa, gomme le tla di fiwa.

# LETŠATŠI LA BO 21

## Tshepo: 1 Petrose 3:15

<sup>15</sup>Fela Kriste yena le mo hlomphe ka dipelo tša lena ka ge e le Morena. Le dule le itokišeditše go iphetolela go yo a le hlohlogo ka tša kholofelo ye le nago le yona.

## Phodišo: Jeremia 33:6

<sup>6</sup>“Fela ke tla alafa motse wo le badudi ba wona ka ba fodiša. Ke tla ba tlišetša boiketlo bja mmakgonthe le polokego.”

## Pušeletšo: Kutollos 21:1-5

<sup>1</sup>Ka bona legodimo le lefsa le lefase le lefsa. Legodimo lela la pele le lefase la pele di be di tlogile, le lewatle le timeletše. <sup>2</sup>Ka bona motse wo mokgethwa, Jerusalema ye mpsha, o theoga legodimong go Modimo, o kgabišitšwe bjalo ka monyadiwa yo a tšhepetšego monyadi wa gagwe. <sup>3</sup>Ka kwa lentšu le goelesa kudu le etšwa setulong sa bogoši le re: “Bjale Modimo o dula le batho. O tla phela le bona, bona ya ba ditšhaba tša gagwe. Yena mong o tla ba le bona, ya ba Modimo wa bona. <sup>4</sup>O tla ba phumola meokgo yohle. Go ka se sa ba le lehu goba manyami goba dillo goba bohloko. Dilo tšela tša kgale di fetile.” <sup>5</sup>Yo a dutšego setulong sa bogoši a re: “Bona, dilo tšohle ke di dira tše mpsha!” A ba a re go nna: “Ditaba tše di ngwale, ka gobane ke tša nnete ebile di a tshepega.”

# LETŠATŠI LA BO 22

## Tshepo: Baheberu 11:10-11

<sup>10</sup>Gobane Abrahamama o be a hlolotšetše motse wa metheo ya sekgonkgothela, motse wo o akantšwego ke Modimo wa ba wa agwa ke yena. <sup>11</sup>Ke tumelo ye e ilego ya kgontšha Abrahamama go tswala ngwana, le ge a be a šetše a tšofetše mme le yena Sara e le moopa, ka gobane o be a dumela gore Modimo o tla phetha se a mo holofeditšego sona.

## Phodišo: Diema 4:20-22

<sup>20</sup>O hlokomele tše ke go botšago tšona, ngwanaka, o hlwaele dipolelo tša ka tsebe.

<sup>21</sup>O se ke wa di lebala; o di boloke ka pelong ya gago. <sup>22</sup>Di phediša ba ba di kwago, di ba phediša gabotse mmeleng le moyeng.

## Pušeletšo: 1 Petrose 5:10

<sup>10</sup>Fela e tla re ge le tlaišitšwe lebakanyana, Modimo yo ka mehla a lokilego, yo a le bileditšego go ba letagong la gagwe la go ya go ile la ba ba tee le Kriste, yena ka noši a le dira ba ba feletšego, a le tiiša tumelong, a le kgwahliša, a dira gore le se tekateke.

## LETŠATŠI LA BO 23

### Tshepo: Jobo 14: 7-9

<sup>7</sup>“Mohlare le ge o remilwe, go ka holofelwa gore o tla phela gape wa hloga. <sup>8</sup>Le ge medu ya wona e ka tšofala, le thito ya wona ya hwela ka mobung, <sup>9</sup>ge o ekwa monola o a hloga, wa hloga le makala bjalo ka semela se sefsa.

### Phodišo: Bafilipi 4:6-7

<sup>6</sup>Le se balabale ka selo; sengwe le sengwe se le se nyakago le se kgopele go Modimo ka moya wa thapelo le tebogo. <sup>7</sup>Ke mo Modimo a tlogo le phefiša go ja pelo le go tshwenyega le le ba Kriste Jesu, mo e lego gore ga go motho yo a kago kwešiša.

### Pušeletšo: Sakaria 9:12

<sup>12</sup>Boelang sebong sa lena, lena bagolegwa le nago le kholofelo. Bjale ke le begela gore ke tla le bušetša gabedi tše le di lobilego.

## LETŠATŠI LA BO 24

### Tshepo: Dipesalome 71:5-6

<sup>5</sup>Gobane nnaena ke tshephile wena, Mong wa ka, wena, Morena. E sa le ke go tshepha go tloga bjaneng bja ka. <sup>6</sup>E sa le ke ithekga ka wena go tloga mola ke tswalwa; ke wena o mpabaletšego go tloga tswalong; nka se lese go go tumiša.

### Phodišo: Jesaya 58:8

<sup>8</sup>“Ke moo go le phološa ga ka go tlogo le hlabela bjalo ka letšatši, gomme dinto tša lena tša fola ka pela. Ke tla le eta pele ke le Mophološi wa lena, gomme letago la ka la le šireletša le le šetše morago.

## **Pušeletšo: Jesaya 42:1-4**

<sup>1</sup>“Morena o re: “Bonang mohlanka wa ka yo ke mo tiišago, mokgethiwa wa ka yo a nkgahlago. Ke mo tladiše moya wa ka, gomme o tla begela ditšhaba maikemišetšo a ka. <sup>2</sup>A ka se hlabe lešata goba a hlaboša lentšu, a ka se bolelele godimo mekgotheng. <sup>3</sup>Lehlaka le le thokgegilego a ka se le robele sa ruri, goba a tima lebone le le tukago gannyane. O tla tliša toka ya go ya go ile. <sup>4</sup>A ka se lape goba a nolega moko, go fihlela a hlomile toka lefaseng. Dinaga tša kgole di letetše go rutwa ke yena.”

## **LETŠATŠI LA BO 25**

### **Tshepo: Dipesalome 43:5**

<sup>5</sup>Wena pelo ya ka, o reng o hlokofetše gakaaka? O reng o ferekane? Tshepha Modimo, gobane ke tla buša ka mo tumiša, yena Mophološi wa ka, Modimo wa ka. God!

### **Phodišo: Hosea 6:1**

<sup>1</sup>Setšhaba se re: “A re sokologeleng go Morena! Ke yena a re rathagantšego, eupša o tla re kgomaganya; o re gobaditše, eupša o tla re tlema dintho.

### **Pušeletšo: 2 Samuele 9:7-9**

<sup>7</sup>“Dafida a re go yena: “O se ke wa boifa. Ke tla ba yo botho go wena ka lebaka la Jonathane, tatago. Ke tla go bušetša naga ka moka ye e bego e le ya rakgolwago, Saulo, gomme ka mehla re tla jela mogopong o tee.” <sup>8</sup>Mefiboshete a obama gape a re: “Nna, mohlanka wa gago, ke lefeelafeela, ke no ba mpša ye e hwilego! Ke go reng o le yo botho go nna ka mokgwa wo?” <sup>9</sup>Kgoši a bitša Tsiba, mohlanka wa Saulo, a re go yena: “Ke fa Mefiboshete, setlogolo sa mong wa gago, se sengwe le se sengwe se e bego e le sa Saulo le lapa la gagwe.

## **LETŠATŠI LA BO 26**

### **Tshepo: Jesaya 54:17**

<sup>17</sup>“Ke nna ke bopilego morulatshipi yo a butšwetšago mollo, gomme a dira dibetša ka bokgoni bja gagwe. Le mohlabani yo a bolayago ka dibetša tšeo o bopša ke nna.

### **Phodišo: Kutollo 22:2**

<sup>2</sup>Mokgahlong ga mmila wo mogolo wa motse le noka yeo go na le sehlare sa bophelo se se enywago ga lesome le metšo ye mebedi ka ngwaga, ke go re gatee ka kgwedi. Matlakala a sona ke a go fodiša ditšhaba.

## **Pušeletšo: Johanese 14:2-3**

<sup>2</sup>Ka ntlong ya Tate go na le madulo a mantši; ge go ka be go se bjalo, na nkabe ke le botša gore ke ya go le lokišetša madulo? <sup>3</sup>Ge ke ile go le lokišetša madulo, ke tla boa ka tla ka le tšea gore le lena le yo ba mo ke lego gona.

## **LETŠATŠI LA BO 27**

### **Tshepo: Dipesalome 119:147**

<sup>147</sup>Ke go llela e sa le ka mahube; ke botile se o nkholofeditšego sona.

### **Phodišo: Markose 2:17**

<sup>17</sup>Jesu a ba kwa gomme a ba fetola a re: “Ngaka ga e nyakwe ke ba ba phedilego gabotse, e nyakwa ke ba ba babjago. Ga se ka tlela go botša baloki gore ba sokologe, ke tletše go botša badiradibe.”

### **Pušeletšo: Bagalatia 6:1**

<sup>1</sup>Banabešo, ge motho a ka swarwa a dira sebe, lena le hlahlwago ke Moya le mo kgale ka moya wo boleta, gomme motho a itote, gore le yena a se lekege.

## **LETŠATŠI LA BO 28**

### **Tshepo: Jeremia 31:13**

<sup>13</sup>Ke tla khoriša baprista ka dijo tša manoni, ka šegofatša setšhaba sa ka kudu. Ke realo, nna, Morena.’

### **Phodišo: Diema 3:5-8**

<sup>5</sup>O tshephe Morena ka pelo ya gago ka moka. O se ke wa tshepha kwešišo ya gago.  
<sup>6</sup>O gopole Morena dilong tšohle tše o di dirago, gomme yena o tla go lokišetša itsela.  
<sup>7</sup>O se ke wa iphora wa re o hlalefile, eupša o boife Morena, gomme o gane go dira tše mpe.  
<sup>8</sup>Go dira bjalo e tla ba mo nkego ke sehlare se se fodišago, sa go lapološa mmele.

### **Pušeletšo: Mateu 6:33**

<sup>33</sup>Lena sa pele le šomele mmušo wa Modimo le tše Modimo a nyakago gore le di phethe, gomme tše dingwe tšeo ka moka o tla le okeletša ka tšona.

## **LETŠATŠI LA BO 29**

### **Tshepo: 2 Bakorinte 3:12**

<sup>12</sup>Ka ge re na le kholofelo ye, re bolela ka sebetse.

## Phodišo: Dipesalome 6:2

<sup>2</sup>Ntšhokelwe Morena, gobane ke fedile maatla. Mphodiše, Morena, gobane bolwetši bo nthenne ditho la go hwa.

## Pušeletšo: Joele 2:22-24

<sup>22</sup>Lena diphoofolo, le se boife ka gobane phulo lešokeng e ba ye tala; mehlare e entšwe, mego le merara le yona e entšwe. <sup>23</sup>“Lena batho ba Sione, hlabang mekgolokwane, le thabele tše Morena Modimo wa lena a le diretšego tšona; o le file pula ye e lekanego, a le nešetša tsheola le kgogolamooko, bjalo ka mengwageng.

<sup>24</sup>Diboa di tllilo tlala mabele; mapitlelo a tla tšhologa beine le makhura a mohlware.

## LETŠATŠI LA BO 30

### Tshepo: Dipesalome 31:24

<sup>24</sup>Tiang maatla, betang dipelo, lena bohle ba le botilego Morena!

### Phodišo: Diema 16:24

<sup>24</sup>Polelo tše bose di swana le mamapo a dinose – a a natefago ka ganong, gape a fepago mmele.

### Pušeletšo: 2 Bakorinte 5:17

<sup>17</sup>Ka lebaka leo, ge motho e le wa Kriste e ba sebopiwa se sefsa; tša kgale di fetile, go tllile tše difsa.

## LETŠATŠI LA BO 31

### Tshepo: Dillo 3:24

<sup>24</sup>Ka pelong ke re: “Morena ke yena kabelo ya ka, ka gona ke botile yena.”

### Phodišo: Ditiro 19:11-12

<sup>11</sup>Modimo o be a dira mehlolo ye megolo ka Paulose. <sup>12</sup>Batho ba bile ba tšea le mašelana a go phumola dikudumela, le dithetho tša go šoma, ba re go mo kgoma ka tšona ba di bea balwetši, mme bona ba fola malwetši a bona, le meoya ye mebe e ba tlogela.

### Pušeletšo: Dipesalome 23:1-3

<sup>1</sup>Morena ke modiši wa ka; ga ke hloke selo. <sup>2</sup>O nkhutšiša mafulong a matala; o nkiša meetseng a makhutšo. <sup>3</sup>O a ntapološa, O ntshepediša ka tsela tše di lokilego ka lebaka la leina la gagwe.

## LETŠATŠI LA BO 32

### **Tshepo: Dipesalome 33:18**

<sup>18</sup>Ke Morena yo a babalelago ba ba mmoifago, bao ba botilego lerato la gagwe, kilaphetogo

### **Phodišo: Jesaya 57:18**

<sup>18</sup>“Ke bone tše ba di dirago, fela ke tla ba alafa. Ke tla ba etetša, gomme ba ba llogo ka ba homotša.

### **Pušeletšo: Joshua 1:9**

<sup>9</sup>A ke re ke go laetše gore o be le sebeta, o tie! O se ke wa boifa goba wa nolega moko, ka gobane nna, Morena Modimo wa gago, ke na le wena gohle mo o yago gona.”

## LETŠATŠI LA BO 33

### **Tshepo: 1 Johanese 3:3**

<sup>3</sup>Jesu a mo fetola ka go re: “Ruri, ruri, ke go botša gore ge motho a sa tswalwe gape, e ka se be wa mmušo wa Modimo.”

### **Phodišo: Numeri 12:13**

<sup>13</sup>Ka gona Moshe a llela Morena a re: “Hle, Modimo, mo fodiše!”

### **Pušeletšo: 2 Samuele 14:14**

<sup>14</sup>Re tla hwa ka moka; re bjalo ka meetse a a tšhologetšego fase, ao a ka se kgobokanywego gape. Le Modimo ga a nyake gore motho a bolawe, fela o loga maano a gore yo a kgetholotšwego ke batho yena a se ke a mo kgetholla.

## LETŠATŠI LA BO 34

### **Tshepo: Jobo 11:18**

<sup>18</sup>O ka se sa boifa selo, gobane o tla be o na le tše o di holofetšego; Modimo o tla go šireletša, wa robala o iketlile.

### **Phodišo: Mateu 11:28**

<sup>28</sup>“Etlang go nna bohle ba le lapilego gape le imelwago, gomme ke tla le khutšiša.

## **Pušeletšo: 2 Dikronika 30:9**

<sup>9</sup>Ge le ka boela go Morena, gona bao ba thophilego meloko ya bolena le bana ba lena ba tla ba šokela gomme ba ba lesa ba boela mo gae. Morena Modimo wa lena ke yo botho mme o na le lešoko, gomme ge le ka boela go yena, o tla le amogela.”

## **LETŠATŠI LA BO 35**

### **Tshepo: Dipesalome 10:17**

<sup>17</sup>Morena, o kwele dillo tša banyatšegi; o tla ba bea pelo, wa kwa.

### **Phodišo: 2 Bakorinte 12:9**

<sup>9</sup>Yena a mphetola ka go re: “Kgaugelo ya ka e go lekane, gobane maatla a ka a tiile kudu mo go ba ba fokolago.” Ka gona ke kgahlwa kudu ke go itheta ka mafokodi a ka, gore maatla a Kriste a tle a dule mo go nna.

### **Pušeletšo: Dipesalome 51:7-8**

<sup>7</sup>Ntlhwekiše sebe ka hisopo, ke mo ke tlogo hlweka. Ntlhapiše ke tage go feta leswela. <sup>8</sup>Nke o nkweše mekgolokwane ke boele ke thabe, mme le ge o nthobagantše marapo ke tla buša ka thaba.

## **LETŠATŠI LA BO 36**

### **Tshepo: Dipesalome 9:18**

<sup>18</sup>Bahlaki ba ka se hloke ka mehla; bahlaki ba ka se dule ba holofetše lefeela.

### **Phodišo: Jesaya 38:16-17**

<sup>16</sup>Mong wa ka, ke phelela wena, wena fela; hle, mphodiše o mphediše. <sup>17</sup>Bohloko bja ka bjo bogolo bo nthušetše. O nthatile mme wa ntlhakodiša lehung, wa ntshwarela dibe tša ka tšohle.

### **Pušeletšo: Johanese 5:24**

<sup>24</sup>Ruri, ruri, ke le botša gore yo a theeletšago tše ke di bolelago mme a dumela go yo a nthomilego, o šetše a na le bophelo bjo bo sa felego. A ka se tšwewe, ka gore o šetše a tlogetše tsela ya go ya lehung, o swere ya go ya bophelong bjo bo sa felego.

## **LETŠATŠI LA BO 37**

### **Tshepo: Dipesalome 78:7**

<sup>7</sup>Gore le bona ba tle ba bote Modimo, ba se lebale ditiro tša gagwe, ba phethe ditaelo tša gagwe.



## Phodišo: Dipesalome 146:8

<sup>8</sup>Ba ba gateletšwego o ba dira ka toka, ba ba swerwego ke tlala o ba fa dijo. Morena o lokolla bagolegwa.

## Pušeletšo: Jeremia 29:12-14

<sup>12</sup>Ke mo e tlogo re ge le nkgopela, le etla le nthapela, nna ka le theeletša. <sup>13</sup>E tla re ge le nnyaka, la nkhwetša, ge eba le nnyaka ka dipelo tša lena ka moka.” <sup>14</sup>Ee, ke re le tla nkhwetša, gomme ke tla le atla gape. Ke tla le kgoboketša ka le ntšha ditšhabeng tšohle le mafelong ohle moo ke le raketšego gona, ka le bušetša nageng ye ke le ntshitšego go yona ge le thopša. Ke realo, nna, Morena.’

## LETŠATŠI LA BO 38

### Tshepo: Dipesalome 38:15

<sup>15</sup>Le ge go le bjalo, ke botile wena, Morena; mme wena, Mong wa ka, wena Modimo wa ka, o tla nkaraba.

## Phodišo: Lukase 4:18

<sup>18</sup> “Moya wa Morena o mo go nna; ke ka lebaka leo a mpeilego gore ke yo begela badiidi Taba ye Botse ya Modimo. O nthomile go begela dibofša gore di tla bofollwa, le difofu gore di tla kgontšhwa go bona, le go lokolla ba ba gateletšwego,

## Pušeletšo: 2 Samuele 19:14-18

<sup>14</sup>Mantšu ao a Dafida a dira gore banna ka moka ba Juda ba eme naye ka botlalo, gomme ba mo romela molaetša wa gore a boe le bahlankedi ba gagwe ka moka. <sup>15</sup>Tseleng ya ge a boela morago a gahlanetšwa ke banna ba Juda ba ba bego ba tlile Gilgale go tlo mo tshediša noka. <sup>16</sup>Ka yona nako yeo Shimi, Mobenjamene, morwa wa Gera wa Bahurime, a potlakela Jordane go yo gahlanetša Kgoši Dafida. <sup>17</sup>O be a na le banna ba sekete ba kgoro ya Benjamene. Gomme Tsiba, mohlanka wa lapa la Saulo, le yena a tla le barwa ba gagwe ba lesome le ba bahlano le bahlanka ba masome a mabedi, mme ba fihla Jordane pele ga ge kgoši a fihla. <sup>18</sup>Ba tshela noka go tlo tshediša ba mošate le go dira tšohle tše kgoši a di nyakago.

## LETŠATŠI LA BO 39

### Tshepo: Diema 3:3-4

<sup>3</sup>O se lese go ba le leratorato le potege; o ikgabiše ka tšona bjalo ka pheta molaleng, o di boloke ka pelong ya gago. <sup>4</sup>Ge o ka dira bjalo o tla kgahla Modimo le batho, wa ba le seriti mo go bona.

## Phodišo: Johanese 11:4

<sup>4</sup>Jesu ge a ekwa a re: “Lehu e ka se be pheletšo ya bolwetši bjoo, e tla ba gore go tumišwe Modimo, le gore ka bjona Morwa wa Modimo a retwe.”

## Pušeletšo: Dipesalome 51:10-11

<sup>10</sup>Modimo, hle, mpopele pelo ye e hlwekilego, mme o ntsenye moya wo mofsa wa potego. <sup>11</sup>Se nthake pele ga gago; se nkamoge moya wa gago wa bomodimo.

## LETŠATŠI LA BO 40

### Tshepo: Dipesalome 130:5

<sup>5</sup>Ke dula ke letetše go thušwa ke Morena, ke letetše ka mafolofolo, k e emetše gore go phethege se a se boletšego.

## Phodišo: Johanese 9:24-25

<sup>24</sup>Ba mmitša la bobedi ba re go yena: “Godiša Modimo o bolele nnete. Rena re tseba ge motho yola a go foufolotšego e le modiradibe.” <sup>25</sup>Yena a ba fetola a re: “Ge e le modiradibe nnaena ga ke tsebe; se ke se tsebago ke gore ke be ke le sefofu, gomme bjale ke a bona.”

## Pušeletšo: Hesechiele 37:1-5

<sup>1</sup>Maatla a Morena a ile a nkaparela, gomme moya wa gagwe wa ntšea wa yo mpea molaleng wo o bego o tletše marapo. <sup>2</sup>Morena a ntshepetša le molala, gomme ka bona go na le marapo a mantšintši, le gona a omeletše kudu. <sup>3</sup>A mpotšiša a re: “Wena motho wa nama, na marapo a a ka buša a phela?” Nna ka mo fetola ka re: “Morena, Mong wa bohle, ke wena fela o tsebago!” <sup>4</sup>Yena a re: “Porofetela marapo a, o a botše o re: ‘Lena marapo a a omeletšego, theeletšang mantšu a Morena.’” <sup>5</sup>O a botše gore nna, Morena, Mong wa bohle, ke re go ona: Ke tla le tsenya moya ka le phediša gape.

## LETŠATŠI LA BO 41

### Tshepo: 2 Bakorinte 4:18

<sup>18</sup>Gobane re lebeletše tše di sa bonwego, e sego tše di bonwago. Gape tše di bonwago ke tša lebakanyana fela, kganthe tše di sa bonwego tšona ke tša go ya go ile.

## Phodišo: Jeremia 3:22

<sup>22</sup>“Morena o re: “Lena setšhaba sa bakgelogi, sokologang, ke le alafe bolwetši bja bokgelogi bja lena.” Etse le re: “Ke rena ba, re tla go wena, gobane o Morena Modimo wa rena.”

## Pušeletšo: Jesaya 49:6

<sup>6</sup>Morena o rile go nna: “Mohlanka wa ka, ke go beetše modiro wo mogolo. Sa gago ga se fela go tlo bušetša mašaledi a Israele nageng ya ona le go a boetša sekeng sa ona, eupša ke tla go dira seetša sa ditšhaba gore bohle ba lefaseng ba phološwe ka wena.”

## LETŠATŠI LA BO 42

### Tshepo: Dipesalome 33:22

<sup>22</sup>Morena, anke leratorato la gago le be le rena, ka ge re botile wena.

### Phodišo: Mateu 8:5-7

<sup>5</sup>Ge Jesu a tsena motseng wa Kapernaume, a gahlanetšwa ke molaodi wa bahlabani ba lekgolo gomme yena a mo kgopela gore a mo thuše a re: <sup>6</sup>“Morena, mohlanka wa ka o a babja, o robotše kua gae; o rephile ditho, le gona o lwala kudu.” <sup>7</sup>Jesu a re: “Ke tla ya ka mo fodiša.”

### Pušeletšo: Doiteronomio 30:6-10

<sup>6</sup>“Morena Modimo wa lena o tla dira gore lena le ditlogolo tša lena le mo theeletše, gore le tle le mo rate ka dipelo tša lena ka moka le ka moya wa lena ka moka, mme le tle le fele le dula moo nageng yeo. <sup>7</sup>Dithogako tše ka moka o tla di lebiša go manaba a lena le go bao ba le hloilego gape ba le hlomerego, <sup>8</sup>mme le tla boela la mo theeletša la phetha ditaelo tša gagwe ka moka tše ke le fago tšona lehono. <sup>9</sup>Morena o tla le atla go tšohle tše le di dirago; le tla ba le bana ba bantši le diruiwa tše ntši, gomme mašemo a lena a tla le ntšhetša puno ye botse. O tla thabela go le atla bjalo ka ge a be a thabetše go atla borakgolokhukhu ba lena, <sup>10</sup>eupša le tla swanelwa ke go mo theeletša le go phetha melao le melawana ya gagwe ye e ngwadilwego mo pukung ye ya dithuto tša gagwe. Le tla swanelwa ke go sokologela go yena ka dipelo tša lena ka moka le ka moya wa lena ka moka.

## LETŠATŠI LA BO 43

### Tshepo: Markose 11:22-24

<sup>22</sup>Jesu a ba fetola a re: “Dumelang go Modimo. <sup>23</sup>Ruri, ke le botša gore yo a ka botšago thaba ye a re: ‘Tloga mo o yo itahlela ka lewatleng’ a sa belaele ka pelong ya gagwe, eupša a dumela gore tše a di bolelago di tla direga, di tla mo diregela. <sup>24</sup>Ka lebaka leo ke le botša gore tšohle tše le kago di kgopela ka thapelo, le dumele gore ruri le tla di fiwa, gomme le tla di fiwa.

## Phodišo: 2 Dikronika 32:24

<sup>24</sup>“Mehleng yeo Kgoši Hiskia a babja a ba a nyako hlokafala. A rapela, mme Morena a bolela le yena, a mo fa sešupo sa semaka sa gore o tla fola.

## Pušeletšo: Hosea 6:2-3

<sup>2</sup>Ka morago ga sebakanyana o tla be a re bušeditše sekeng gomme ra phela re mo rapela. <sup>3</sup>A re lekeng go tseba Morena. Ruri, o tla tla go rena bjalo ka masa, bjalo ka pula ya tsheola ye e thapišago lefase.”

## LETŠATŠI LA BO 44

### Tshepo: 2 Timotheose 1:7

<sup>7</sup>Gobane moya wo Modimo a re filego wona ga o re dire gore re boife; o re tlatša maatla le lerato le boitshwaro.

## Phodišo: Dipesalome 41:4

<sup>4</sup>“Nna ke ile ka re: “Morena, ntshokele o mphodiše, le ge ke go fošeditše.”

## Pušeletšo: Diema 6:30-31

<sup>30</sup>Lehodu la go utswa dijo go ntšha tlala maleng batho ga ba le sole; <sup>31</sup>eupša ge le ka swarwa le lefišwa gašupa, le ge e ka ba ka thoto yohle ya lapa la lona..

## LETŠATŠI LA BO 45

### Tshepo: Baroma 15:4

<sup>4</sup>Tšohle tše di ngwadilwego ka Mangwalong a Makgethwa mehleng ya kgale di ngwaletšwe go re ruta, gore re tle re be le kholofelo ka go se fele pelo le go tiišwa ke tše di ngwadilwego.

## Phodišo: Diema 12:18

<sup>18</sup>Polelo ya yo a sa kgethego mantšu e ka gobatša motho bjalo ka tšhoša, ya yo bohlale yona e a fodiša.

## Pušeletšo: Nahume 2:2

<sup>2</sup>Agee, Ninibe, agee! Manaba, bomaphušola, a a go hlasela! Leta dibo tša gago. Dula o dišitše tsela! Itokišetše ntwā, o rape madira a gago kgothekgothe!

## LETŠATŠI LA BO 46

### **Tshepo: Ditiro 24:15**

<sup>15</sup>Ke holofela bjalo ka bona gore Modimo o tla tsoša batho bohle bahung, ba go loka le ba go se loke.

### **Phodišo: Mateu 4:23**

<sup>23</sup>Jesu a sepela le naga ya Galilea ka moka, a ruta ka disinagogeng, a bega Taba ye Botse ya mmušo wa Modimo, a fodiša batho malwetši le mafokodi a bona.

### **Pušeletšo: Hesechiele 20:40-41**

<sup>40</sup>Gona kua nageng ya lena, thabeng ya ka ye kgethwa, thabeng ye e phagamego ya Israele, ke mo le tlogo nkhumamela gona, lena setšhaba sohle sa Israele. Le tla be le nkgahla mme ke tla nyaka gore le ntlisetše dihlabelo le dikabelo tša lena tše dibotsebotse, gotee le dimpho tša lena tše dikgethwa. <sup>41</sup>Mohla ke le ntšha ditšhabeng ke le kgoboketša dinageng tše le šwalalanyeditšwego go tšona, ke tla le amogela bjalo ka ge nke le monkgo wo mbose, ka ipontšha ke le mokgethwa gare ge lena ditšhaba di ntebeletše.

## LETŠATŠI LA BO 47

### **Tshepo: 2 Bakorinte 4:8-9**

<sup>8</sup>Re tlaišwa ka mekgwa yohle, fela ga re palelwe; re mo kgakanegong, fela ga re itlhuboge; <sup>9</sup>re a hlomarwa, fela Modimo ga a re tlogele; re digelwa fase, fela ga re feleletšwe.

### **Phodišo: Markose 6:56**

<sup>56</sup>Mo gohle mo a tsenago gona, metsaneng le metseng le merakeng, batho ba be ba bea balwetši mapatlelong a motse mme ba mo rapela gore a ba dumelele go kgwatha le ge e ka ba morumo wa kobo ya gagwe; gomme bohle ba ba o kgwathilego ba be ba fola.

### **Pušeletšo: Lukase 16:19-23**

<sup>19</sup>“Go kile gwa ba le monna yo mongwe wa mohumi a apara diaparo tše dibotse, le gona a dula a ipshina ka tša matsaka. <sup>20</sup>Lesorong la gagwe go be go hlwa go tlišwa monna yo mongwe wa modiidi wa go tlala dišo, yo leina la gagwe e bego e le Lasarose. <sup>21</sup>Yena o be a duma go iphepa ka marathana a a wago tafoleng ya mohumi yoo. Dimpša le tšona di be di fela di etla di mo latswa dišo. <sup>22</sup>“Monna yola wa modiidi a ikhwela, gomme barongwa ba mo kuka ba yo mmea madulong a a hlomphegago kgauswi le Abrahamama legodimong. Mohumi yola le yena a tla a hwa, a bolokwa. <sup>23</sup>Ya re ge a le kua bodulabahu a ekwa bohloko bjo bogolo, a lelala gomme a bona Abrahamama a le kgole, a dutše le Lasarose..

## LETŠATŠI LA BO 48

### **Tshepo: 1 Petrose 1:13**

<sup>13</sup>Ka gona, phafogang le be le boitshwaro, le dule le letetše ka mafolofolo mpho ya phološo ye le tlogo e fiwa mohla Jesu Kriste a etla.

### **Phodišo: Lukase 13:12**

<sup>12</sup>Jesu ge a mmona a mmitša a re a tle go yena. Ge a fihla a re go yena: Mmagobatho, o imolotšwe bolwetšing bja gago!”

### **Pušeletšo: Dipesalome 23:4-6**

<sup>4</sup>Le ge nka sepela molapong wo o šiišago, nka se boife selo, gobane wena, Morena, o na le nna. O ntšhireletša ka molamo wa gago, ka lepara la gago wa ntlahla. <sup>5</sup>O ntirela monyanya manaba a ka a ntebeletše; o nkamogela mo nkego ke moeng yo mogolo, wa ntlaletša senwelo wa go falala. <sup>6</sup>Ke a tseba gore botho le lerato la gago di tla ba le nna bophelong bja ka ka moka, gomme ke tla dula ka ngwakong wa gago ge ke sa phela.

## LETŠATŠI LA BO 49

### **Tshepo: Markose 5:36**

<sup>36</sup>Jesu a hlokomologa se ba se bolelago, gomme a re go Jairose: “Se tšhoge, sa gago a e be go dumela.”

### **Phodišo: Jesaya 38:20**

<sup>20</sup>Morena, o mphodišitše. Re tla letša dikwadi ra go tumiša Tempeleng ya gago bophelong bjohle bja rena.

### **Pušeletšo: Ditiro 2:38**

<sup>38</sup>Petrose a ba fetola a re: “Sokologang mme ka moka le kolobetšwe le be ba Jesu Kriste, gore le swarelwe dibe tša lena; gomme le tla amegedišwa mpho ya Modimo, e lego Moya wo Mokgethwa.

## LETŠATŠI LA BO 50

### **Tshepo: Dipesalome 119:114**

<sup>114</sup>Wena o bokhuto bja ka le boširelo; ke holofetše se o se boletšego.

### **Phodišo: 2 Dikgoši 20:5**

<sup>5</sup>Morena a mmotša gore a boele go Hiskia, mmuši wa setšhaba ba Morena, a re go yena: “Nna, Morena, Modimo wa rakgolokhukhu wa gago, Dafida, ke kwele thapelo

ya gago mme ke bone megokgo ya gago. Ke tla go fodiša, gomme ka letšatši la boraro o tla ya Tempeleng.

### **Pušeletšo: Johanese 3:16**

<sup>16</sup>“Gobane Modimo o ratile lefase kudu mo a ilego a ba a le fa Morwa wa gagwe a le noši, gore mang le mang yo a dumelago go yena a se lahlege, eupša a be le bophelo bjo bo sa felego.

## LETŠATŠI LA BO 51

### **Tshepo: Dipesalome 130:7**

<sup>7</sup>Israele, holofela Morena, gobane lerato la gagwe ga le fetoge, gomme o dula a itokišeditše go phološa.

### **Phodišo: Mateu 17:18-20**

<sup>18</sup>Jesu a kgalema modemone yoo, wa tšwa mošemaneng, mme mošemane a fola ka yona nako yeo. <sup>19</sup>Ke moka barutiwa ba tla go Jesu ba nnoši, ba mmotšiša ba re: “Ke ka lebaka lang rena re šitilwe ke go leleka modemone yola?” <sup>20</sup> Jesu a ba fetola a re: “Ke ka gobane le hlaela tumelo. Ruri, ke le botša gore ge le ka be le na le tumelo ye e lekanago le thorwana ya mphogo, le be le ka botša thaba ye la re: ‘Tloga mo o ye mola!’ gomme ya ya. Le be le ka se šitwe ke selo.”

### **Pušeletšo: Jesaya 2:1-5**

<sup>1</sup>Wo ke molaetša wo Modimo a o boditšego Jesaya, morwa wa Amotse, mabapi le Juda le Jerusalema: <sup>2</sup>Nako e etla yeo ka yona thaba ye Tempele e agilwego godimo ga yona e tla bago ye e phagamego go feta dithaba ka moka, ya okamela mebototo yohle. Ditšhaba ka moka di tla e kgeregela, <sup>3</sup>gomme merafe ye mentši ya re: “A re rotogeleng thabeng ya Morena re yeng Tempeleng ya Modimo wa Israele. O tla re ruta tše a nyakago re di dira; ra phela ka moo a nyakago ka gona, gobane Morena o ruta a le Sione, o bolela a le Jerusalema.” <sup>4</sup>O tla ahlola ditšhaba, a kgaola ditshela merafeng ye mentši. Batho ba tla kgatla ditšhoša ya ba megoma, gomme marumo ya ba ditsedi. Ditšhaba di ka se sa lwa, di ka se sa ithuta go lwa. <sup>5</sup>Bjale etlang, lena ditlogolo tša Jakobo, le sepeleng seetšeng seo Morena a re fago sona.

## LETŠATŠI LA BO 52

### **Tshepo: Jobo 17:15**

<sup>15</sup>Ke be ke tla be ke sa botile eng? A ke mang yo a ka tsebago se nka se holofelago?

## Phodišo: Mateu 12:13

<sup>13</sup>Ke moka a re go monna yola wa go repha letsogo: “Otlolla letsogo la gago.” Monna yola a le otlolla, gomme la fola la swana le lela le lengwe.

## Pušeletšo: Amose 9:13-15

<sup>13</sup>Morena o re: “Matšatši a etla ao ka ona go tla bego go sa bunwa ge selemo se lemologa, le diterebe e tla ba tše dintši mo e lego gore batho ba tla be ba sa di pitla ka maoto go dira beine ge go lengwa. Matutu a diterebe a tla rotha dithabeng, a ela a etšwa mebotong yohle. <sup>14</sup>Ke tla bušetša setšhaba sa ka sekeng sa sona; ba tla tsošološa metse ya bona ye e bego e le marope, mme ba dula gona; ba tla lema dirapa tša merara, ba nwa beine ya yona; ba tla lema dirokolo, ba ja tše ba di bjetšego. <sup>15</sup>Setšhaba sa ka ke tla se bea nageng ye ke se filego yona, gomme se ka se sa tlošwa moo.” Ke realo, nna, Morena Modimo wa lena.

## LETŠATŠI LA BO 53

### Tshepo: Dipesalome 119:116

<sup>116</sup>Nthuše ka mo o nkholofeditšego ka gona, gomme ke tla phela. Ka ge ke botile wena, o se ntshwabiše.

## Phodišo: Mateu 9:20-22

<sup>20</sup>Gwa tla mosadi yo mongwe yo a bego a feditše mengwaga ye lesome le metšo ye mebedi a bolawa ke bolwetši bja ngope, gomme a kgwatha morumo wa seaparo sa gagwe. <sup>21</sup>O be a rile ka pelong: “Ge nka no kgwatha seaparo sa gagwe, ke tla fola.” <sup>22</sup>Jesu a retologa, a mmona a re: “Beta pelo, morwedi wa ka! Tumelo ya gago e go fodišitše.” Ka yona nako yeo mosadi yoo a fola.

## Pušeletšo: Sakaria 10:6

<sup>6</sup>“Ke tla tiiša batho ba Juda; ke tlahlakodiša ditlogolo tša Josefa. Ke tla ba šokela mme ka ba bušetša nageng ya gabobona. E tla ba mo nkego ga se nke ka ba lahla, gobane ke nna Morena Modimo wa bona, mme ke tla kwa dithapelo tša bona.

## LETŠATŠI LA BO 54

### Tshepo: Dipesalome 119:81

<sup>81</sup>Ke hloletše kudu gore o mphološe; ke holofetše se o se boletšego.

## Phodišo: 2 Dikronika 30:18-20

<sup>18</sup>Ntle le fao ba bantši ba ba bego ba etšwa kgorong ya Efraime le ya Manase le ya Isakara le ya Sebulone ba be ba se ba itlhwekiša, gomme ba keteka Paseka ka bošaedi. Kgoši Hiskia a ba rapelela a re: <sup>19</sup>“Wena Morena yo botho, Modimo wa



borakgolokhukhu ba rena, hle, le balela ba ba go khunamelago ka dipelo tša bona ka moka, le ge ba se ba hlweka.” <sup>20</sup>Morena a kwa thapelo ya Hiskia; a le balela setšhaba gomme a se ke a se otl.

### **Pušeletšo: Hesechiele 16:55**

<sup>55</sup>Banabeno, Samaria le Sodoma, gotee le metsana ya kgauswi le bona, ba tla iketla gape, le wena le metsana ya kgauswi le wena le tla iketla gape.

## **LETŠATŠI LA BO 55**

### **Tshepo: Titose 2:13**

<sup>13</sup>Re ntše re letetše se re se holofelago sa go re thabiša, mohla letago la Modimo wa rena yo mogolo, yena Mophološi wa rena, Jesu Kriste, le tšwelela.

### **Phodišo: Dipesalome 107:20**

<sup>20</sup>O be a ba fodiša ka taelo fela, gomme a ba hlakodiše lehung.

### **Pušeletšo: Jeremia 31:1-5**

<sup>14</sup>Morena o re: “Go tla tla nako yeo ka yona ke tlogo ba Modimo wa dikgoro tšohle tša Israele, gomme bona e tla ba setšhaba sa ka. <sup>2</sup>Kua lešokeng ke ile ka šokela batho bale ba go phonyokga ntweng. Mohla setšhaba sa Israele se le leetong la go ya bokhutšong nageng ya sona, <sup>3</sup>ke ile ka iponagatša go sona ke le kgole. Lena setšhaba sa Israele, ka ge e sa le ke le rata go tloga mathomong, le bjale ke tla no fela ke le botegetše. <sup>4</sup>Wena moratiwa wa ka, setšhaba sa Israele, ke tla buša ka go tsošološa wa tsosološega. O tla swanelwa ge o letša meropa ya gago, o yo bina le bao ba thabilego. Lena setšhaba sa Israele, le tla buša la lema dirapa tša merara dithabeng tša Samaria, gomme bao ba di lemago ba tla ja diterebe tša gona. <sup>5</sup>Ee, nako e batametše yeo ka yona bafeti ba tlogo goeletša ba le dithabeng tša Efraime ba re: ‘A re rotogeleng Sione, go Morena Modimo wa rena!’ ”

## **LETŠATŠI LA BO 56**

### **Tshepo: Diema 24:14**

<sup>14</sup>Tseba gore le bohlale bo bjalo mothong. Ge o ka bo hwetša o tla ba le bokamoso bjo bo kgahlišago, le kholofelo ya gago e ka se be ya lefeela.

### **Phodišo: Doiteronomio 32:39**

<sup>39</sup>Bjale bonang, nna ke nnoši ke Modimo; ga go modimo yo mongwe ka ntle le na. Ke a bolaya, ebile ke a phediša, ke a gobatša, ka ba ka fodiša, mme ga go yo a ka kgonago go nthibela go se ke se dirago.

## **Pušeletšo: Jesaya 41:17-20**

<sup>17</sup>“Setšhaba sa ka se a hlaka, se a diila, se nyaka meetse eupša ga a gona; ba omile megolo ka lenyora. Nna, Morena, ke tla ba fa tše ba di kgopelago. Nna, Modimo wa Israele, nka se ba lahle. <sup>18</sup>Ke tla phula dinoka mebotong ye e sa melego selo, le methopo melaleng. Ke tla fetoša leganata megobe, mme naga ye e omilego ya ba methopo ya meetse. <sup>19</sup>Ke tla mediša mesedere leganateng, le megohlo le memirte le mehlware. Ke tla bjala mehlare ye mentši naging ye e omilego – mephaene ya mehutahuta le mesaeprese. <sup>20</sup>Ke tla dira dilo tše gore batho ba di bone ba di tsebe mme ba gopodišise gore di dirilwe ke nna, Morena. Ba tla kwešiša gore Modimo yo mokgethwa wa Israele ke yena a dirilego dilo tše.”

## **LETŠATŠI LA BO 57**

### **Tshepo: Dipesalome 145:15**

<sup>15</sup>Diphedi tšohle di go lebelela di holofetše, gomme o di fa dijo lebakeng la gona.

### **Phodišo: Jeremia 14:19**

<sup>19</sup>Na o namile o lahletše batho ba Juda sa ruri? Batho ba Sione o a ba šišingwa? O re gobaleditšeng gakaaka mo e bilego re sa kgone go fola? Re be re holofetše go hwetša khutšo, fela go padile; re holofetše gore mathata a tla fela, eupša ke gona re welwa ke tše di šišago.terror.

### **Pušeletšo: Jesaya 49:13**

<sup>13</sup>Goang ka lethabo, lena magodimo! Letša mokgolokwane, wena lefase! Dithaba a di duduetše ka gobane Morena o tllilo homotša setšhaba sa gagwe; o tla se šokela ka ge se tlišega.

## **LETŠATŠI LA BO 58**

### **Tshepo: Titose 1:2**

<sup>2</sup>Sona se ithekgilego ka go holofela bophelo bjo bo sa felego. Modimo yo a sa bolelego maaka o re holofeditše bjona go tloga le go tloga.

### **Phodišo: Markose 8:25**

<sup>25</sup>Jesu a buša a mmea diatla, fela bjale ya ba mo mahlong, gomme sefofu ge se lebeledišiša, sa bona se foletše ruri se bona gabotse.

### **Pušeletšo: Numeri 6:25-27**

<sup>25</sup>Morena a go edišetše sefahlego sa gagwe, a go gaugele; <sup>26</sup>Morena a go lebelele ka botho, mme a go fe khutšo. <sup>27</sup>Morena a ba a re: “Ge ba bolela leina la ka ka mokgwa wo go laetša gore ke setšhaba sa ka, gona nna ke tla ba šegofatša.”

## LETŠATŠI LA BO 59

### **Tshepo: 1 Bathesalonika 5:8**

<sup>8</sup>Eupša rena ba re lego ba mosegare a re ntšheng mahlo dinameng, re apareng tumelo le lerato, e be tšona difahlelakgara tša rena, mme kholofelo ya go phološwa e be mongatse wa rena wa tshipi.

### **Phodišo: Lukase 4:41**

<sup>41</sup>Le bademone ba tšwa go batho ba bantši ba goeletša ba re: “Wena o Morwa wa Modimo!” Jesu a ba kgalema a ba ganetša go bolela, ka gore ba be ba tseba gore ke yena Mesia.

### **Pušeletšo: Jesaya 49:23**

<sup>23</sup>Go lena magoši a tla swana le bahlokamedi ba bana, bommakgoši ba ba bjalo ka baledi. Ba tla le obamela ba le hlompha ka boikokobetšo. Ke gona le tlogo tseba gore Morena ke nna; yo a botilego go thušwa ke nna a ka se lewe ke dihlolong.”

## LETŠATŠI LA BO 60

### **Tshepo: Bagalatia 5:5**

<sup>5</sup>Ge e le rena re holofetše gore re tla lokafatšwa ke Modimo; gomme seo ke sona se re se letetšego ka maatla a Moya wo Mokgethwa wo o šomago ka tumelo ya rena.

### **Phodišo: Lukase 8:48**

<sup>48</sup>“Jesu a re go yena: “Morwedi wa ka, tumelo ya gago e go fodišitše. Sepela gabotse.”

### **Pušeletšo: Dipesalome 121:1–6**

<sup>1</sup>Ke lelalela kua dithabeng; ke botile go thušwa ke mang? <sup>2</sup>Ke botile go thušwa ke Morena, Mohlodi wa legodimo le lefase. <sup>3</sup>A ka se go lese o kgopša; Mošireletši wa gago ga a potume. <sup>4</sup>Ee, Mošireletši wa Israele ga a potume, le gona ga a robale. <sup>5</sup>Morena ke Mošireletši wa gago; o šika le wena go go leta. <sup>6</sup>Letšatši le ka se go dire selo mosegare, le ge e le wona ngwedi bošego.

## LETŠATŠI LA BO 61

### **Tshepo: Baefeso 1:18**

<sup>18</sup>Ke rapela gore a le bonegele menagano, gore le tsebe se le bileditšwego go se holofela, le tsebe ge tše Modimo a tlogo di fa badumedi e le tše di makatšago ruri.

## Phodišo: Dipesalome 31:9

<sup>9</sup>Ntšhokele, Morena, gobane ke mo tlalelong. Mahlo a ka a gohlometše ka lebaka la sello; ke lapile mmele le moya.

## Pušeletšo: Jeremia 31:23-25

<sup>23</sup>“Batho ba tla dula nageng ya Juda le metseng yohle ya yona gotee le balemi le badiša le mehlape ya bona. <sup>24</sup>Ke tla lapološa ba ba lapilego, ka khoriša bohle ba ba swerwego ke tlala. <sup>25</sup>Ka gona motho o tla re: ‘Ke ile ka robala, ka tsoga, ka lebaleba, ka kwa ke lapologile.’”

## LETŠATŠI LA BO 62

### Tshepo: Jeremia 31:16-17

<sup>16</sup>Go sa na le se sengwenyana se o ka se holofelago; bana ba gago ba tla boela gae. Ke realo, nna, Morena. <sup>17</sup>“Ke kwa batho ba Efraime ba bolela ka bohloko ba re: “‘Joo, Morena o re otlile, re otlilwe bjalo ka pholwana ye e sego ya tlwaetšwa. Re bušetše go wena mme re tla boa, ka gobane ke wena Morena Modimo wa rena.”

## Phodišo: Eksodose 15:26

<sup>26</sup>A re: “Ge le ka ntheeletša gabotsebotse, la dira tše ke bonago di lokile, la phetha ditaelo tša ka, gona nka se le otle le ka bjo botee bja malwetši ale ke otlilego Baegepete ka ona. Gobane ke nna Morena, Moalafi wa lena.”

## Pušeletšo: Titose 2:11-12

<sup>11</sup>Gobane Modimo o utolotše kgaugelo ya gagwe ye e kgontšhago batho ka moka go phološwa. <sup>12</sup>Ke yona ye e re rutago gore re tlogele go phela bophelo bjo bo hlokomologago Modimo, le go laolwa ke ditumo tša lefaseng, gomme mehleng yeno re phele re itshwere ka tshaologanyo, re le ba ba lokilego, ba borapedi.

## LETŠATŠI LA BO 63

### Tshepo: Dipesalome 146:5

<sup>5</sup>Go lehlogonolo yo a thušwago ke Modimo wa Jakobo, yo a botilego Morena Modimo wa gagwe.

## Phodišo: 2 Bakorinte 1:3-4

<sup>3</sup>A go retwe Modimo, Tatago Morena wa rena, Jesu Kriste, yena Ralešoko, Modimo, Mokgothatši wa ka mehla. <sup>4</sup>O re kgothatša mathateng ohle a rena, gore ka kgothatšo ya gagwe le rena re tle re kgone go kgothatša ba bangwe ge ba le mathateng a mehutahuta.

## **Pušeletšo: Dipesalome 40:13–17**

<sup>13</sup>Hle, Morena, ntlhatlole! Itlhaganele o nthuše! <sup>14</sup>A ba inyatše ba itshesengwe bohle ba ba lekago go mpolaya. A ba katakate ba gobogile ba ba ntlholelago mathata. <sup>15</sup>A ba gakantšhwe ke go fenywa ba ba rego go nna: “Aga! Swine!” <sup>16</sup>Bohle ba ba go nyakago a ba thabe ba gobele ka ge e le ba gago. Bohle ba ba hloloselago go phološwa ke wena a ka mehla ba re: “Morena ke yo mogolo!” <sup>17</sup>Nnaena ke mohlaki ebile ke mohloki, eupša wena, Mong wa ka, ga o ntebale. Ke wena Mothuši wa ka le Mophološi wa ka; se diege, hle, Modimo wa ka!

## **LETŠATŠI LA BO 64**

### **Tshepo: Dipesalome 27:13**

<sup>13</sup>Ge nkabe ke se ka dumela gore ke tla bona botho bja Morena mo bophelong bjo nkabe ke hwile.

### **Phodišo: Ditiro 10:38**

<sup>38</sup>Ke yona taba ya Jesu wa Nasaretha, ya ge Modimo a mo tloiditše a mo fa Moya wo Mokgethwa le maatla. Yena o sepetše gohle a dira tše dibotse, a fodiša bohle ba ba gateletšwego ke Diabolose, gobane Modimo o be a na le yena.

### **Pušeletšo: Jeremia 31:33–34**

<sup>33</sup>Motho a ka se sa swanela go ruta mogagabo goba morwarragwe a re: ‘Tseba Morena,’ ka gobane bohle ba tla be ba ntseba, banyatšegi le bahlomphegi. Ke tla ba swarela bokgopo bja bona, gomme nka se sa gopola dibe tša bona. Ke realo, nna, Morena.’ <sup>34</sup>Morena o hlabiša letšatši gore e be seedi mosegare, o laela ngwedi le dinaledi gore di tage bošego. O ferehla lewatele mme maphoto a rora; leina la gagwe ke Morena Ramaatlaohle.

## **LETŠATŠI LA BO 65**

### **Tshepo: Titose 3:7**

<sup>7</sup>Gore ka kgaugelo ya gagwe re tle re lokafatšwe gomme re rue bophelo bjo bo sa felego bjo re bo holofetšego.

### **Phodišo: Lukase 13:13**

<sup>13</sup>A mmea diatla, mosadi yoo a nama a hlophologa le semeetseng, gomme a reta Modimo.

### **Pušeletšo: Jobo 42:11–12**

<sup>11</sup>Bomorwarrago Jobo ka moka le dikgaetšedi le bagwera ba gagwe ba pele ba tla go mo etela, gomme ba ja le yena monyanyeng wa gagwe ka lapeng. Ba mo kwela

bohloko mme ba mo homotša masetlapelong ale Morena a bego a mo tlišeditše ona. Yo mongwe le yo mongwe wa bona a mo fa tšhelete le palamonwana ya gauta.

<sup>12</sup>Bjale Morena a šegofatša Jobo kudu go feta pele. A rua dihuswane tše dikete tše lesome le tše nne, le dikamela tše dikete tše di seelago, le dikgomo tše dikete tše pedi, le dipokolo tše sekete.

## LETŠATŠI LA BO 66

### **Tshepo: 1 Dikronika 29:15**

<sup>15</sup>Ka gobane mo pele ga gago re bafaladi le bašele bjalo ka borakgolokhukhu ba rena. Matšatši a rena a bjalo ka morithi wo o fetago, gomme ga re kgone go phelela sa ruri.

### **Phodišo: Markose 1:30-31**

<sup>30</sup>Mmatswale wa Simone o be a robetše a swerwe ke letadi; Jesu a botšwa ka ga yena. <sup>31</sup>A ya go yena, a mo tsoša a mo swere ka seatla. Molwetši a fola letadi, gomme a ba apeela.

### **Pušeletšo: Jesaya 61:4-7**

<sup>4</sup>Ba tla tsošološa meago yela e phušotšwego mehleng ya pele. <sup>5</sup>Lena setšhaba sa ka, bašele ba tla le dišetša mehlape, ba le lemela mašemo, ba le hlokomelela le dirapa tša merara. <sup>6</sup>Le tla tsebja le le baprista ba Morena, bahlanka ba Modimo wa rena. Le tla ipshina ka mahumo a ditšhaba, gomme la ikgantšha ka ona. <sup>7</sup>Bakeng sa go lewa ke dihlong le tla hlomphega kudu, mme bakeng sa go goboga la duduetša, ka ge Morena a le šegofaditše. Le tla dula nageng ya lena, gomme moo thoto tša lena tša oketšega gabedi; lethabo la lena e tla ba la go ya go ile.

## LETŠATŠI LA BO 67

### **Tshepo: Baheberu 10:23**

<sup>23</sup>A re kgomareleng kholofelo ye re nago le yona, ka gobane Modimo yo a re holofeditšego o a botega.

### **Phodišo: Dipesalome 41:1-3**

<sup>1</sup>Go lehlogonolo motho yo a hlokomelago bahlaki; Morena o tla mohlakodiša mohla a wetšego mathateng. <sup>2</sup>Morena o tla mo šireletša a mo phediša; o tla mo letla mo nageng ye; a ka se mo lahletše manabeng. <sup>3</sup>Ge a babja, Morena o tla mo thekga, a mo fodišetša sa ruri.

## **Pušeletšo: Jesaya 60:10–13**

<sup>10</sup>“Morena o re go Jerusalema: “Batho ba šele ba tla tsošološa merako ya gago, gomme magoši a bona a tla go hlankela. Ke go otlile ke befetšwe, eupša bjale ke tla go thabela ka go šokela. <sup>11</sup>Dikgoro tša gago di tla dula di butšwe, bošego le mosegare di ka se tswalelwe, gore magoši a ditšhaba a go tlišetše mahumo a tšona a etile batho ba bona pele. <sup>12</sup>Eupša ditšhaba le mebušo ye e sa go hlankelego di tla fedišwa taa. <sup>13</sup>“Dikota tša mephaene ya mehutahuta le mesaeprese, e lego tšona dikota tše dibotsebotse tša dithokgwa tša Lebanone, di tla tlišwa go wena, Jerusalema, go tlo kgabiša Tempele ya ka, gore go thakgwe bogato bjoo bja dinao tša ka.

## **LETŠATŠI LA BO 68**

### **Tshepo: Dillo 3:21-23**

<sup>21</sup>Eupša e re ge ke elelwa taba e tee ye, ke tlelwe ke lehutšo. <sup>22</sup>Leratorato la Morena ke le le sa felego, dikgaugelo tša gagwe ke tša go ya go ile. <sup>23</sup>O di tsošološa mosong wo mongwe le wo mongwe, potego ya gagwe ga e kaaka.

### **Phodišo: Lukase 6:19**

<sup>19</sup>Batho ka moka ba be ba leka go mo kgwatha, ka gobane go yena go be go etšwa maatla mme a ba fodiša bohle.

## **Pušeletšo: Jeremia 31:20-22**

<sup>20</sup>Itlhomele dišupatsela, o swaye tselakgolo ye o tšeago ka yona, o lebelediše wona mmila woo. Boang, lena setšhaba sa Israele, boelang metseng ye le e tlogetšego ye. <sup>21</sup>Le tla ba pelopedi go fihla neng, bakgelogi tenang? Ke dirile se sengwenyana se sefsa, go swana le mosadi ge a šireletša monna.”<sup>22</sup>Morena Ramaatlaohle, Modimo wa Israele, o re: “Mohla ke bušetša setšhaba nageng ya sona, se tla buša sa bolela nageng ya Juda le metseng ya yona sa re: “ ‘Nke Morena a go šegofatše, wena thaba ye kgethwa, felo mo gokgethwa mo a dulago gona.’

## **LETŠATŠI LA BO 69**

### **Tshepo: Dipesalome 119:49**

<sup>49</sup>O se lebale se o nkholofeditšego sona, nna, mohlanka wa gago; ke sona se se mphilego lehutšo.

### **Phodišo: Ditiro 3:6**

<sup>6</sup>Fela Petrose a re go yena: “Tšhelete yona ga ke nayo, eupša se ke nago le sona ke go fa sona: Ka maatla a Jesu Kriste wa Nasaretha, ema o sepele!”

## **Pušeletšo: Dipesalome 66:12**

<sup>12</sup>Wa lesa batho ba re gataka godimo, ra feta gare ga mollo le gare ga meetse, fela wa re ntšha wa re hlakodiša.

## **LETŠATŠI LA BO 70**

### **Tshepo: Baheberu 6:18-19**

<sup>18</sup>Ka gona, tšeo ke taba tše pedi tše di ka se hlanamišwego, tšeo go tšona Modimo a ka se bolelego maaka. Gomme rena re tšhabetšego go yena re kgothatšega kudu go itshwarelela ka se re se holofelago. <sup>19</sup>Kholofelo ye ke bjona boithekgo bjo bo tiilego bja maphelo a rena, mme e putla seširo ya tsenelela ka Felo mo Gokgethwakgethwa

### **Phodišo: Mateu 13:15**

<sup>15</sup>Ka gobane setšhaba se se thatafetše; ba ithibile ditsebe, ba pontše mahlo, gore ba se ke ba bona ka mahlo, ba kwa ka ditsebe, goba ba kwešiša ka megopolo mme ba sokologa, ka ba fodiša.'

## **Pušeletšo: Doiteronomio 11:18-21**

<sup>18</sup>"Le loteng tše ke le laetšego tšona ka dipelong tša lena mme le di boloke. Le di tlemelele matsogong a lena le be le di rwale diphatleng tša lena e le digopotšo. <sup>19</sup>Le di rute bana ba lena. Le boleleng ka tšona ge le le gae le ge le le maetong, ge le khutša le ge le šoma. <sup>20</sup>Le di ngwaleng direpoding tša mengwako ya lena, le dikgorong tša lena. <sup>21</sup>Ke moo lena le bana ba lena le tlogo dula nako ye telele nageng yeo Morena Modimo wa lena a enetšego borakgolokhukhu ba lena gore o tla le fa yona. Le tla dula moo go yona ge legodimo le lefase di sa le gona.

## **LETŠATŠI LA BO 71**

### **Tshepo: Baroma 5:5**

<sup>5</sup>Kholofelo yeo ga e re swabiše, gobane lerato la Modimo le tšhetšwe ka dipelong tša rena ke Moya wo Mokgethwa wo re o filwego.

### **Phodišo: Mmoledi 3:1-3**

<sup>1</sup>Dilo ka moka di na le lebaka la tšona, tšohle di na le nako ye di e beetšwego ke Modimo lefaseng. <sup>2</sup>Go na le nako ya go tswalwa le nako ya go hwa; nako ya go bjala le nako ya go tumola; <sup>3</sup>nako ya go bolaya le nako ya go alafa; nako ya go phušola le nako ya go aga;

## **Pušeletšo: Dipesalome 80:17-19**

<sup>17</sup>Šireletša setšhaba se o se kgethilego, sona setšhaba se o itiišeditšego sona, <sup>18</sup>ke mo re ka se sa go furalalago. Re lote re phele, ke mo re tlogo go rapela. <sup>19</sup>Boela o re



atle, hle, Morena, Modimo Ramaatlaohle; o re edišetše sefahlego, ke mo re tlogo phela.

## LETŠATŠI LA BO 72

### **Tshepo: Jobo 8:13**

<sup>13</sup>Bohle ba ba itebatšago Modimo le bona ba ba bjalo; ke ka mo le mohlokamodimo a felelwago ke tshepo ka gona.

### **Phodišo: Jobo 5:17-18**

<sup>17</sup>“Yo lehlogonolo ke wa go kgalwa ke Modimo; ka gona o se gane go solwa ke Ramaatlaohle. <sup>18</sup>Modimo o re go gobatša, a be a fodiše; a re go hlokofatša, a be a thobe.

### **Pušetšo: Dipesalome 69:35-36**

<sup>35</sup>Gobane Modimo o tla hlakodiša Sione, a tsošološa metse ya Juda. Setšhaba sa gagwe se tla dula gona sa ithopela naga. <sup>36</sup>Ditlogolo tša bahlanka ba gagwe di tla e abelwa ya ba lefa la bona; ba ba mo ratago ba tla dula go yona.

## LETŠATŠI LA BO 73

### **Tshepo: Baroma 4:18**

<sup>18</sup>Abrahama o dumetše a holofetše, le ge lebaka la go holofela le be le se gona, ka gona a ba “tatagoditšhaba tše dintši”, go ya ka mo a bego a holofeditšwe ka gona, moo Mangwalo a Makgethwa a rego: “Ditlogolo tša gago di tla ata bjalo.”

### **Phodišo: 2 Dikronika 7:14**

<sup>14</sup>Ge ba ka nthapela ba ikokobetša ba tla go nna gomme ba tlogela ditsela tša bona tše mpe, gona ke tla ba kwa ke le legodimong, ka ba lebalela dibe, gomme ka boetša naga ya bona sekeng sa yona.

### **Pušetšo: Sakaria 14:11**

<sup>11</sup>Batho ba tla itulela moo Jerusalema ba iketlile, motse wa bona wa se sa ba kotsing ya go fedišwa.

## LETŠATŠI LA BO 74

### **Tshepo: Baheberu 6:11**

<sup>11</sup>Se re se dumago kudu ke gore mongwe le mongwe wa lena a bontšhe mafolofolo a mabjalo go fihlela mafelelong, gore tše le di holofelago di tle di phethagale.

## Phodišo: Eksodose 23:25

<sup>25</sup>Ge le nkhumamela, nna, Morena Modimo wa lena, ke tla le šegofatša ka dijo le meetse, gomme ka tloša malwetši ka moka gare ga lena.

## Pušeletšo: Mika 7:19-20

<sup>19</sup>O tla buša wa re gaugela. O tla gata makgopo a rena ka maoto, wa lahlela dibe tša rena fasefase ka lewatleng! <sup>20</sup>O tla bontšha setšhaba sa gago, ditlogolo tša Jakobo, gore o a se botegelela, ebile o se rata ka leratorato bjalo ka ge o ile wa enela borakgolokhukhu ba rena kgalekgale.

## LETŠATŠI LA BO 75

### Tshepo: Jeremia 17:17

<sup>17</sup>O se ke wa ntšhoša; ge masetlapelo a etla ke wena botšhabelo bja ka.

## Phodišo: Dipesalome 119:107

<sup>107</sup>Ke tlaišegile e le ruri, Morena; ntsošološe go ya ka mo o nkholofeditšego.

## Pušeletšo: 2 Dikgoši 8:1-4

<sup>1</sup>Bjale Elisha o be a boditše mosadi yola a bego a dula Shuneme, yo a ilego a tsoša morwa wa gagwe a hwile, gore Morena o romela tlala ye e tlogo tšea mengwaga ye e šupago nageng, le gore a tloge le lapa la gagwe a diilele mo a ka hwetšago madulo. <sup>2</sup>Mosadi yoo o be a dirile ka moo a laetšwego ka gona, a tlogile le lapa la gagwe go yo diilela Filistia mengwaga ye e šupago. <sup>3</sup>Ya re ge mengwaga yeo e fetile, a boela Israele gomme a ya go kgoši go yo kgopela gore ngwako wa gagwe le tšhemo ya gagwe di boetšwe go yena. <sup>4</sup>A hwetša kgoši a bolela le Gehasi, mohlanka wa Elisha; kgoši o be a nyaka go tseba ka ga mehlolo ya Elisha.

## LETŠATŠI LA BO 76

### Tshepo: Dipesalome 119:74

<sup>74</sup>Ba ba go boifago ba tla thabela go mpona, ka gobane ke ikanya se se boletšwego ke wena.

## Phodišo: Jakobose 5:11

<sup>11</sup>Rena re bona ba ba ilego ba kgotlelela e le ba lehlogonolo. Tša kgotlelelo ya Jobo le di kwele, gomme le tseba le ka mo Morena a ilego a mo hlakodiša melekong ya gagwe ka gona. Gobane Morena o tletše kgaugelo le kwelobohloko.

## **Pušeletšo: 2 Dikgoši 8:5-6**

<sup>5</sup>Mola Gehasi a sa botša kgoši ka moo Elisha a kilego a tsoša motho a hwile, mosadi yola a llela kgoši ka ga ngwako wa gagwe le tšhemo ya gagwe. Ke moo Gehasi a itšego go kgoši: “Mosadi yoo šo, le morwa yoo wa gagwe a tsošitšwego a hwile šo, kgoši, mong wa ka!” <sup>6</sup>Ke moka kgoši a botšiša mosadi yoo ditaba tšeo gomme yena a tiišetša se Gehasi a se boletšego. Ka gona kgoši a bitša mohlankedi yo mongwe a mmošša gore a boetše go mosadi tšohle tše e bego e le tša gagwe, gotee le puno ya tšhemo ya gagwe ya mengwageng ye e šupago ge a be a se gona.

## **LETŠATŠI LA BO 77**

### **Tshepo: 1 Timotheose 4:9-10**

<sup>9</sup>O leke go tla mono go nna kgauswinyana. <sup>10</sup>Demase o ntahlile ka lebaka la go rata tša lefase le, gomme o iketše Thesalonika. Kresense o ile Galatia, Titose yena o ile Dalmatia.

### **Phodišo: Mateu 14:13-14**

<sup>13</sup>Ge Jesu a ekwa tše di hlagetšego Johanese, a tloga fao ka leselawatle a nnoši a ikela felo mo gongwenyana mo go se nago batho. Batho ba kwa gore o ile kae, mme ba tloga metseng ya bona ba mo latela ba sepela ka maoto. <sup>14</sup>Jesu ge a etšwa ka leselawatleng a bona lešaba le legolo, a le šokela, gomme a fodiša balwetši ba bona.

### **Pušeletšo: Hesekiele 34:25-27**

<sup>25</sup>Ke tla dira kgwerano le bona gore ba phele ka khutšo. Ke tla raka dibata tšohle nageng gore dihuswane tša ka di tle di phele di bolokegile mafulong, mme di ithobalele ka fase ga mehlare. <sup>26</sup>Ke tla di šegofatša gotee le tikologo ya thaba ya ka ye kgethwa. Ke moo ke tlogo di šegofatša ka dipula tša matlorotloro ka nako ya tšona. <sup>27</sup>Mehlare ya naga e tla enywa dikenywa, mašemong gwa ba le dibjalo, gomme batho ba dula ba bolokegile nageng ya bona. Mohla ke hunolla setšhaba sa ka go bagateledi ba sona mme ke se lokolla go bao ba se dirilego makgoba, ke gona se tlogo lemoga gore ke nna Morena.

## **LETŠATŠI LA BO 78**

### **Tshepo: Bakolose 1:5-6**

<sup>5-6</sup>Mohla molaetša wa nnete, e lego yona Taba ye Botse ya Jesu, o le tlela la mathomo, le ile la kwa ka kholofelo ye o e tlišago. Ka gona, tumelo ya lena le lerato di ithekgile ka se le se holofetšego, se le se lotetšwego legodimong. Ebangedi e bega kgaugelo ya Modimo, gomme e phatlalala le lefase ka moka ka mokgwa wo le go lena e ilego ya phatlalala mohlamonene ge le thoma go kwa tša kgaugelo ya Modimo le bile le thoma go e tseba ka mo e lego ka gona.

## Phodišo: Hesechiele 34:16

<sup>16</sup>“Ke tla nyaka tše di timetšego, ka buša tše di šwalalanego, ka tlema dintho tša tše di gobetšego, ka alafa tše di lwalago, eupša tše di nonnengo le tše di nago le maatla tšona ke tla di fediša, ka gobane ke nna modiša wa toka.

## Pušeletšo: Hesechiele 34:28-31

<sup>28</sup>Ditšhaba tše dingwe di ka se sa ba hula, gomme le dibata di ka se ba je. Ba tla dula ba bolokegile, ba sa tšhošwe ke motho. <sup>29</sup>Ke tla dira gore naga ya bona e tsebege ka monono wa yona gore ba se sa hwa ka tlala. Ditšhaba tše dingwe di ka se sa ba nyatša. <sup>30</sup>Baisraele ba tla lemoga gore nna Morena, Modimo wa bona, ke na le bona, le gore bona ke setšhaba sa ka. Ke realo, nna, Morena, Mong wa bohle. <sup>31</sup>“Lena le dihuswane tša ka, le mohlape wo ke o fudišago, le setšhaba sa ka, gomme nna ke Modimo wa lena.” O realo, Morena, Mong wa bohle.”

## LETŠATŠI LA BO 79

### Tshepo: 1 Petrose 1:21

<sup>21</sup>Ke ka yena mo le dumelago go Modimo yo a mo tsošitšego bahung a mo godiša; gomme bjale tumelo ya lena le kholofelo ya lena di tsepeletše go Modimo.

### Phodišo: 2 Dikgoši 5:6

<sup>6</sup>Lengwalo le Naamane a bego a le swere le be le re: “Ka lengwalo le ke go tsebiša mohlankedi wa ka, Naamane. Ke mo rometše go wena gore o mo fodiše bolwetši bja gagwe.”

### Pušeletšo: Dipesalome 13:3-5

<sup>3</sup>Ntebelele hle, Morena, Modimo wa ka, mme o nkarabe ge ke go rapela. Ntapološo gore ke se nape ka hwa, <sup>4</sup>gore lenaba la ka le se re: “Ke mo swinne!” gore dira tša ka di se thabele go wa ga ka. <sup>5</sup>Ge e le nna ke itshepetše lerato la gago, kilaphetogo; ke tla hlalalela ge o ntlhakoditše.

## LETŠATŠI LA BO 80

### Tshepo: 2 Bathesalonika 2:16-17

<sup>16</sup>A Morena wa rena, Jesu Kriste ka noši, le Modimo, Tatagorena, yo a re ratilego mme ka kgaugelo ya gagwe a dulago a re kgothatša a bile a re tiiša kholofelong, <sup>17</sup>a le kgothatše a be a le tiiše go dira le go bolela tšohle tše dibotse.

### Phodišo: Mateu 9:27-30

<sup>27</sup>Ge Jesu a tloga fao a latelwa ke banna ba babedi ba difofu. Ba be ba goa ba re: “Re šokele, Morwa wa Dafida!” <sup>28</sup>Ge Jesu a tsene ka ngwakong, banna bale ba difofu

ba tla go yena, gomme yena a ba botšiša a re: “Na le dumela gore nka le fodiša?” Bona ba mo fetola ba re: “Ee, Morena!” <sup>29</sup>Ke moo Jesu a ba kgwathilego mahlo a re: “A go direge ka mo le dumelago ka gona!” <sup>30</sup>Gomme ba buduloga mahlo. Jesu a ba botša tsebegokwa a re: “Le se ke la botša motho taba ye!”

### **Pušeletšo: Lukase 7:15**

<sup>15</sup>Mohu a tsoga mme a thoma go bolela. Jesu a mo iša go mmagwe.

## **LETŠATŠI LA BO 81**

### **Tshepo: Dipesalome 119:166**

<sup>166</sup>Morena, nna ke letetše go phološwa ke wena, gomme melao ya gago ke a e phetha.

### **Phodišo: Dillo 2:13**

<sup>13</sup>Jerusalema, moratiwa, na nka go swantšha le eng? Nka go bapiša le eng? Nka go lekantšha le eng, gore ke go bee pelo, wena Sione? Masetlapelo a gago a lekana le lewatle ka bogolo. Ke mang a ka go hlatlolago go ona?

### **Pušeletšo: Hesechiele 36:33-36**

<sup>33</sup>Morena, Mong wa bohle, o re: “Mohla ke le hlatswa dibe tšohle ke tla le dudiša metseng ya lena gape, la tsošološa marope. <sup>34</sup>Bafeti bohle ba be ba bona ka mo mašemo a lena a letšego ka gona; eupša a tla buša a lengwa. <sup>35</sup>Batho ba tla re naga ye e bego e letše ye bjale e swana le serapa sa Edene; le metse ya gona ye e bego e phušotšwe, e hutšwe mme e tlogetšwe e le marope, bjale e na le batho mme e ageleditšwe. <sup>36</sup>Ke gona mašaledi a ditšhaba tše di le potapotilego a tlogo tseba gore nna, Morena, ke tsošološa metse ye e phušotšwego, ka ba ka lema gape mašemo a a bego a letše. Nna, Morena, ke boletše bjalo, gomme ke tla phetha.”

## **LETŠATŠI LA BO 82**

### **Tshepo: Baheberu 3:6**

<sup>6</sup>Kriste yena o botegetše Modimo e le Morwa wa go buša lapa la gagwe. Rena, ge eba re na le sebate ebile re holofela re tišitše, gona re ba lapa la gagwe.

### **Phodišo: 1 Bakorinte 12:9**

<sup>9</sup>Yo mongwe o fiwa ke Moya woo tumelo, mola mongwe, ka kgaugelo ya Modimo, a fiwa ke wona dimpho tša go fodiša.

## **Pušeletšo: 1 Samuele 30:18-19**

<sup>18</sup>Dafida a phološa batho bohle le dilo tšohle tše Baamaleke ba bego ba di thopile, gotee le basadi bale ba gagwe ka babedi; <sup>19</sup>gwa se ke gwa ba le se a sa se hwetšego. Dafida a buša barwa le barwedi ba banna ba gagwe ka moka, le thoto ka moka ye Baamaleke ba bego ba e tšere.

## **LETŠATŠI LA BO 83**

### **Tshepo: Dipesalome 42:11**

<sup>11</sup>Wena pelo ya ka, o reng o hlokofetše gakaaka? O reng o ferekane? Tshepha Modimo, ka gobane ke tla buša ka mo tumiša, yena Mophološi le Modimo wa ka.

### **Phodišo: Ditiro 5:15-16**

<sup>15</sup>Ka lebaka la mehlolo ye baapostola ba bego ba e dira, balwetši ba be ba išwa ditseleng ba robotšwe malaong le magogweng, gore e re ge Petrose a feta, ba bangwe ba bona ba upše ba kgongwe ke moriti wa gagwe. <sup>16</sup>Le batho ba ba tšwago metseng ya ka mathoko a Jerusalema ka bontši ba tliša ba ba lwalago le ba ba tlaišwago ke meoya ye mebe, gomme bohle ba fodišwa.

### **Pušeletšo: 2 Bakorinte 5:18-19**

<sup>18</sup>Tšeo ka moka di dirwa ke Modimo, yo a re boelantšego le yena ka Jesu Kriste, le rena a re fa modiro wa go boelanya ba bangwe le yena. <sup>19</sup>Molaetša wa rena ke wa gore Modimo o boelanya batho ba lefase le yena ka Kriste. Ga a ba balele dibe tša bona, le gona o re laetše go botša batho ka mo a ba boelanyago le yena ka gona.

## **LETŠATŠI LA BO 84**

### **Tshepo: 1 Bathesalonika 1:3**

<sup>3</sup>Ge re le pele ga Modimo, Tatagorena, re gopola tše le di dirilego ge le dumela, ka mo lerato la lena le le dirilego gore le šome gaboima ka gona, le ka mo le phetšego le holofela go Morena wa rena, Jesu Kriste, ka gona.

### **Phodišo: Ditiro 9:34**

<sup>34</sup>A re go yena: “Enease, Jesu Kriste o a go fodiša. Tsoga, o ikalolele malao.” Enease a akgofa a tsoga.

### **Pušeletšo: Hesechiele 37:26-28**

<sup>26</sup>Ke tla dira kgwerano ya go ya go ile le bona ya go ba tlišetša khutšo. Ke tla ba bea moo mme ka ba atiša, ka aga Tempele ya ka nageng ya bona, moo e tlogo dulela sa ruri. <sup>27</sup>Ke tla dula le bona moo; ke tla ba Modimo wa bona, mme bona ya ba setšhaba sa ka. <sup>28</sup>Ge ke agile Tempele ya ka moo nageng ya bona gore e dulele sa

ruri, ke gona ditšhaba di tlogo lemoga gore nna, Morena, ke kgethile Baisraele gore e be setšhaba sa ka.”

## LETŠATŠI LA BO 85

### **Tshepo: Baefeso 2:12-13**

<sup>12</sup>Ka nako yeo lena le be le arogane le Kriste. Le be le se ba setšhaba sa Israele. Le be le se ba dikgwerano tše Modimo a di dirilego le setšhaba sa gagwe e le tše a bego a ba holofeditše tšona pele; le be le phela mo lefaseng le se na se le se letetšego, le sa tsebe Modimo. <sup>13</sup>Eupša bjale le ba tee le Kriste Jesu. Lena pele le bego le le kgole le Modimo bjale le batameditšwe ka madi a Kriste.

### **Phodišo: Markose 3:9-10**

<sup>9</sup>Lešaba la batho e be e le le legolo moo Jesu a ilego a ba a laela barutiwa ba gagwe gore ba dule ba mo lokišeditše leselawatle gore lešaba leo le se ke la mo pitlaganya. <sup>10</sup>Ka ge a be a fodiša batho ba bantši, bohle ba ba bego ba babja ba ile ba mmokanela gore ba mo kgwathe.

### **Pušeletšo: Dipesalome 78:53-55**

<sup>53</sup>A ba eta pele a ba šireleditše, ba sa boife selo; manaba a bona ona a a ribegetša ka lewatle. <sup>54</sup>A ba iša nageng ya gagwe ye kgethwa, nagathota ye a ithopetšego yona. <sup>55</sup>A raka ditšhaba ge Baisraele ba etla; kgoro tšohle tša Israele a di elela naga, a di bea magaeng a ditšhaba tšela.

## LETŠATŠI LA BO 86

### **Tshepo: Ditiro 4:13**

<sup>13</sup>Ba Kgorokgolo ya Bajuda ba ile ba tlabega ge ba bona Petrose le Johanese ba bolela ka go se boife, mola bona ba kwele gore banna bao ga se ba go rutega, ga se ba maemo. Le gona ba be ba lemoga gore banna bao ke ba bangwe ba bale ba bego ba šika le Jesu.

### **Phodišo: Lukase 7:7**

<sup>7</sup>Ke ka lebaka leo le go tla go wena ka bonna ke bonego go se gwa ntshwanela. Eno bolela lentšu le tee, gomme mohlanka wa ka o tla fola.

### **Pušeletšo: Joshua 24:13**

<sup>13</sup>Ke le file naga ye le sego la ka la e lema, le metse ye le sego la ka la e aga. Bjale le dula moo mme le ja dienywa tša merara le tša mehlware ye le sego la e bjala.’”

## LETŠATŠI LA BO 87

### **Tshepo: Dipesalome 25:5**

<sup>5</sup>O ntlhahle gore ke phele ka therešo ya gago; o nthute, gobane o Modimo, Mophološi wa ka. Ka mehla ke botile wena.

### **Phodišo: Ditiro 28:8-9**

<sup>8</sup>Tatagwe o be a le diphateng a swerwe ke letadi le tengkhwibidu. Paulose a ya ka phapošing ya gagwe, a fihla a mo rapelela, a mmea diatla, a mo fodiša. <sup>9</sup>O rile go mo fodiša bjalo, balwetši bohle ba sehlakahlaka seo ba tla, gomme Paulose a ba fodiša.

### **Pušeletšo: Jobo 33:26**

<sup>26</sup>Ge a rapela, o tla kgahla Modimo; o tla tla pele ga Modimo a thabile; Modimo o tla mmušetša sekeng sa gagwe.

## LETŠATŠI LA BO 88

### **Tshepo: Bakolose 1:23**

<sup>23</sup>Fela le swanetše go dula le tieletše tumelong le sa šikinyege kholofelong ye le bilego nayo mohla le botšwa Ebangedi. Nna, Paulose, ke mohlanka wa yona Ebangedi ye, yona ye e begelwago batho bohle lefaseng.

### **Phodišo: Lukase 14:4**

<sup>4</sup>Bona ba homola. Ke ge Jesu a tšea molwetši yola a mo fodiša, mme a mo lesa a itshepelela.

### **Pušeletšo: Jesaya 51:1-3**

<sup>1</sup>Morena o re: “Ntheeletšeng, lena le nyakago go phološwa, lena le tlogo go nna gore ke le thuše. Gopodišišang borakgolokhukhu ba lena, bona e lego leswika le le betlilwego go lona, le molete wo le epilwego go wona. <sup>2</sup>Gopolang rakgolokhukhu wa lena, Abrahama, le Sara, makgolokhukhu wa lena. Mola ke bitša Abrahama o be a se ne ngwana, eupša ka mo šegofatša mme ka mo atišetša ditlogolo. <sup>3</sup>“Ke tla homotša Jerusalema, gomme ba ba dulago maropeng a yona ka ba bea pelo. Le ge naga ya yona e le leganata, ke tla e fetošša serapa sa Edene; le ge e le lešoka, ke tla e dira sona serapa seo sa Modimo. Go tla ba le lethabo le boipshino, gwa kwala dikoša tša ditebogo le medumo ya diletšo.



## LETŠATŠI LA BO 89

### **Tshepo: Bafilipi 1:20**

<sup>20</sup>Se ke se dumago kudu gape ke se holofelago ke gore ke se ke ka dira selo se se kago nteša dihlong, eupša gonabjale le ka mehla ke be le mafolofolo a gore Kriste a tumišwe ka tšohle tše ke di dirago – ana ke a phela, ana ke a hwa.

### **Phodišo: Lukase 5:17**

<sup>17</sup>Ka tšatši le lengwe Jesu o be a ruta batho. Bafarisei ba bangwe le boramangwalo ba ba bego ba etšwa metseng ka moka ya Galilea le Judea ešita le kua Jerusalema le bona ba be ba dutše fase moo. Maatla a Morena a be a le mo go Jesu gore a fodiše balwetši.

### **Pušeletšo: Baroma 8:28-30**

<sup>28</sup>Gape re tseba ge go ba ba ratago Modimo dilo ka moka di šomela go ba hola, bona bao a ba bidityego go ya ka mo a bego a ikemišeditše ka gona. <sup>29</sup>Etse bao a ilego a ba kgetha o ile a ba rerela gore ba tle ba swane le Morwagwe, gore yo Morwagwe a tle a be le banababo ba bantši, mme yena e be mogolo wa bona. <sup>30</sup>Bao Modimo a ba reretšego go swana le Morwagwe, o ba biditye; bao a ba bidityego o ba lokafaditye, gomme bao a ba lokafadityego o ba dirile gore ba be le letago.

## LETŠATŠI LA BO 90

### **Tshepo: Baefeso 4:4**

<sup>4</sup>Ka ge bohle le na le Moya o tee wo Mokgethwa, le bopa mmele o tee seng sa lena, bjalo ka ge se ke se holofetšego e le se tee gomme e le sona se Modimo a le biledityego go se dira.

### **Phodišo: Dipesalome 30:2**

<sup>2</sup>Ke go lletše, Morena Modimo wa ka, mme wa mphodiša bolwetšing.

### **Pušeletšo: Johanese 4:24-26**

<sup>24</sup>Gape Modimo ke Moya, gomme ba ba mo rapelago ba swanetše go mo rapela ka maatla a Moya le ka mo go mo lebanego.” <sup>25</sup>Mosadi yoo a re go yena: “Ke a tseba gore Mesia, yo a bitšwago Kriste, o etla. Yena o tla re go tla, a re botša tšohle.”

<sup>26</sup>Jesu a mo fetola a re: “Ke nnaena yo a bolelago le wena yo.”

## LETŠATŠI LA BO 91

### **Tshepo: Joele 3:16**

<sup>16</sup>Morena o bopa thabeng ya Sione; lentšu la gagwe le porotla Jerusalema, gwa šikinyega lefase le leratadima. Fela go setšhaba sa gagwe yena ke botšhabelo, ke sebo sa bona Baisraele.

### **Phodišo: Jesaya 19:22**

<sup>22</sup>Morena o tla otlala Baegepeta ka bolwetši, mme ka morago ga moo, ge ba sokologela go yena ba mo rapela, a ba kwa, a ba fodiša.

### **Pušeletšo: Hosea 14:4-7**

<sup>4</sup>Asiria e ka se kgone go re phološa, le dipere tša ntwadi ka se re hole ka selo. Re ka se sa tsoga re boditše medimo ye re itiretšego yona ka diatla ra re ke medimo ya rena. Morena, ke wena o šokelago ba ba tlogetšwego ke ditšhaba.” <sup>5</sup>Morena o re: “Ke tla bušetša setšhaba sa ka go nna, ka dira gore se se sa kgeloga. Ke tla ba rata ka pelo ya ka ka moka, gobane ga ke sa ba galefetše. <sup>6</sup>Go setšhaba sa Israele ke tla ba bjalo ka phoka. Ba tla atlega boka matšoba a a thunyago; ba tla tia medu go etša mehlare ya Lebanone. <sup>7</sup>Ba tla ba le bana ba bantši, gape ya ba ba babotse boka mehlware. Ba tla nkga bose go swana le mesedere ya Lebanone.

## LETŠATŠI LA BO 92

### **Tshepo: 2 Bakorinte 4:1**

<sup>1</sup>Modimo o re babaletše a re fa modiro wo, ka gona ga re nyame.

### **Phodišo: Johanese 4:47**

<sup>47</sup>Yena o rile go kwa gore Jesu o tšile moo Galilea a etšwa Judea, a ya go yena a mo kgopela gore a ye Kapernaume go mo fodišetša morwa yo a bego a le makgatheng.

### **Pušeletšo: Jesaya 1:25-26**

<sup>25</sup>Ke tlilo le otlala. Ke tla le hlwekiša boka tshipi moubelong, gomme ka le ntšha tšhila yohle. <sup>26</sup>Ke tla le beela babuši bjalo ka pele, ka le fa baeletši bjalo ka mathomong. Ke gona Jerusalema e tlogo bitšwa motse wa toka, felo ga potego.”

## LETŠATŠI LA BO 93

### **Tshepo: Habakuk 3:17-19**

<sup>17</sup>Le ge mego e ka se khukhuše, le merara ya se enywe, le ge puno ya mehlware e ka pala, le mašemo a se be le dijo, le ge mašaka a ka felelwa ke dihuswane, le meraka ya dikgomo ya se be le selo, <sup>18</sup>nna ke tla no thaba ka thakgala, gobane Morena

Modimo ke Mophološi wa ka. <sup>19</sup> Morena, Mong wa bohle, o mpha maatla. O ntshepetša gabotse bophelong, ka swana le kgama dithabeng, a ba a ntshepediša ke bolokegile le mebotong.

### **Phodišo: Dipesalome 119:92–93**

<sup>92</sup>Ge nkabe ke be ke sa kgahlwe ke melao ya gago, nkabe ke ile ka hwela mohlakong wa ka. <sup>93</sup>Ditaelo tša gago nka se di lebale, gobane ke tšona tše o ntsošološago ka tšona.

### **Pušeletšo: Jobo 8:6**

<sup>6</sup>Ge o ka hloka bosodi wa ba yo a lokilego, Modimo o tla go phafogela a go thuša, a tsoša lapa la gago ka mo go swanelago.

## **LETŠATŠI LA BO 94**

### **Tshepo: 1 Timotheose 1:1**

<sup>1</sup>Nna, Paulose, yo ka thato ya Modimo ke lego moapostola wa Kriste Jesu, nna yo ke romilwego go yo bega kholofetšo ya bophelo bjo re nago le bjona ka go ba ba tee le Kriste Jesu.

### **Phodišo: Ditiro 9:40–41**

<sup>40</sup>Petrose a re go ba ntšhetša ntle ka moka a khunama a rapela; ke moka a retologela go setopo, a re go sona: “Thabitha, tsoga!” Thabitha a ponyologa, a re go bona Petrose a tsoga, a dula. <sup>41</sup>Petrose a mo swara ka seatla a mo emiša. A bitša badumedi bale gotee le bahlologadi bale, a ba neela yena a phedile.

### **Pušeletšo: Baheberu 1:1–5**

<sup>1</sup>Mehleleng ya kgale Modimo o boletše le borakgololokhukhu ba rena gantši le ka mekgwa ye mentši ka baprofeta, <sup>2</sup>ya re mehleleng yeno ya mafelelo re phelago go yona a tla a bolela le rena ka Morwagwe. Ke yena yo a hloedilego legohle ka yena, yo a mmeilego mojalefa wa tšohle. <sup>3</sup>Go yena go bonala letago la Modimo, ke yena seswantšho sa nnete sa sebele sa Modimo, gomme o lota tšohle ka lentšu la gagwe le maatla. Ge a phethile modiro wa go hlatswa batho dibe, o ile a yo dula legodimong madulong a bogoši kgauswi le Modimo Kgoši. <sup>4</sup>Morwa wa Modimo o godišitšwe go feta barongwa, go swana le lona leina le a le filwego ge le feta a bona. <sup>5</sup>Etse Modimo ga se a ka a botša yo mongwe wa barongwa a re: “O Morwa wa ka, lehono ke go tswetše.” Le bona barongwa Modimo ga se a ka a bolela ka yo mongwe wa bona a re: “Ke tla ba Tatagwe, gomme yena e tla ba Morwa wa ka.”

## LETŠATŠI LA BO 95

### **Tshepo: Ditiro 23:6**

<sup>6</sup>Ka ge Paulose a be a tseba gore ba bangwe ba bona moo ke Basadusei, ba bangwe ke Bafarisei, a goelela moo Kgorongkgolo a re: “Bagešo, nna ke Mofarisei, Mofarisei wa Bafarisei. Ke sekišwa ka ge ke holofela gore bahu ba tla tsoga!”

### **Phodišo: Dipesalome 34:20**

<sup>20</sup>Morena o mo šireletša mmele wohle; ga go lerapo la gagwe le le robegago.

### **Pušeletšo: Jesaya 11:6-9**

<sup>6</sup>Phiri e tla dula le kwanyana, le nkwe ya robala le putšane. Namane le tawana di tla iphepa mmogo, gomme mošemanyana yo monyenyane ya ba modiša wa tšona. <sup>7</sup>Kgomo le bere di tla fula gotee, mme namane tša tšona tša robala mmogo. Tau e tla fula bjang bjalo ka kgomo. <sup>8</sup>Lesea le tla raloka moleteng wa letsolobolo, wa go tshwa letswele a tsenya seatla ka moleteng wa petla. <sup>9</sup>Sione, thabeng ye kgethwa ya Modimo, go ka se dirwe tše mpe goba gwa gobatšanwa, ka gobane naga e tla be e tletše batho ba ba tsebago Morena bjalo ka ge lewatile le tletše meetse.

## LETŠATŠI LA BO 96

### **Tshepo: Diema 14:32**

<sup>32</sup>O kgopo o ipolaya ka ditiro tša gagwe tše mpe, moloki yena o šireletšwa ke boloki bja gagwe.

### **Phodišo: Mateu 15:29-31**

<sup>29</sup>Jesu a tloga fao a tla lebopong la letsha la Galilea. A namela thaba a dula fase. <sup>30</sup>Mašaba a mantši a tla go yena ba tliša digole, difofu, dihlotša, dimumu le balwetši ba bangwe ba bantši ba ba bea pele ga Jesu, gomme yena a ba fodiša. <sup>31</sup>Batho ba makala ge ba bona dimumu di bolela, dihlotša di sepela gabotse, digole di fodišitšwe, le difofu di bona, gomme ba reta Modimo wa Israele.

### **Pušeletšo: Dipesalome 45:10-15**

<sup>10</sup>Ngwetši, ntheeletše o hlwaye tsebe: Ba geno le meloko yeno o ba le bale. <sup>11</sup>Ke mo botse bja gago bo tlogo kgahla kgoši; ke yena mong wa gago, o mo hlomphe. <sup>12</sup>Batho ba Tirose ba tla go tlišetša dimpho; bahumi ba tla leka go ithatiša wena. <sup>13</sup>Morwedi wa kgoši o gona ka mošate – ga se botse ke tlaang le bone! Kobo ya gagwe e logilwe ka tlhale ya gauta. <sup>14</sup>O gorošwa go kgoši a apere kobo ya mebalabala, a latelwa ke bafeletšši, bagwera ba gagwe; e bona ba tlišwa go kgoši. <sup>15</sup>Ba a gorošwa ba tsenywa ka mošate ka lethabo le mekgolokwane.

## LETŠATŠI LA BO 97

### **Tshepo: 1 Bathesalonika 4:13**

<sup>13</sup>Banabešo, re rata ge le tseba gabotse tša ba ba ithobaletšego, gore le tle le se ke la hlokofala, la etša ba ba se nago kholofelo.

### **Phodišo: Mateu 28:6-7**

<sup>6</sup>Ga a gona mo, o tsogile bahung bjalo ka ge a ile a bolela. Etlang le bone mo a bego a robaditšwe gona. <sup>7</sup>Napang le itlhaganele, le yo tsebiša barutiwa ba gagwe le re: ‘O tsogile bahung, gomme bjale o le thaka pele go ya Galilea; ke moo le tlogo mmona gona.’ Ke wona molaetša wo ke le tlišeditšego wona.”

### **Pušeletšo: Esra 3:1-5**

<sup>1</sup>Kgweding ya bošupa setšhaba sa Israele se be se dutše metseng ya sona. Ke moka sa phuthegela Jerusalema, <sup>2</sup>gomme Jeshua, morwa wa Jotsadaka, le baprista ba bangwe, le Serubabele, morwa wa Sealtiele, gotee le meloko yabo, ba aga aletare ya Modimo wa Israele ka lefsa, gore ba tle ba tšhumele dihlabele godimo ga yona go ya ka ditaelo tšela di ngwadilwego ka melaong ya Moshe, monna wa Modimo. <sup>3</sup>Le ge mathopša a a boilego a be a boifa batho ba ba bego ba dula moo nageng, a ile a aga aletare ka lefsa gona mola e bego e agilwe pele. Ka morago ga moo ba thoma gape go dira dihlabele tša go tšhungwa ka moka tša mehleng tša mesong le tša mantšiboa godimo ga yona. <sup>4</sup>Ba bina Monyanya wa Mešaša go ya ka mo go ngwadilwego ka gona; letšatši le lengwe le le lengwe ba dira dihlabele tše di nyakegago letšatšing leo; <sup>5</sup>gomme godimo ga moo ba dira dihlabele tša go tšhungwa ka moka le tša Monyanya wa Lebalana le tša menyanya ye mengwe ka moka ya ka mehla ye go yona go bego go khunamelwa Morena. Ba mo abela le dikabele ka moka tšeo di bego di abelwa yena ka boithaopo.

## LETŠATŠI LA BO 98

### **Tshepo: Dipesalome 94: 18-19**

<sup>18</sup> Ge ke be ke ekwa gore ke a thedimoga, o be o nthekga ka leratorato la gago, Morena. <sup>19</sup>Ge ke be ke balabala kudu ka pelo, o be o nkhomotša.

### **Phodišo: Ditiro 9:17-18**

<sup>17</sup>Ananiase a ya, a fihla a tsena ka lapeng leo Saulo a bego a le ka go lona, a mmea diatla a re: “Saulo, ngwanešo, Morena – yena Jesu yo a itšweleditšego go wena tseleng ge o etla mono – o nthomile gore wena o boele o bone, le gore o tlatšwe Moya wo Mokgethwa.” <sup>18</sup>Ya re a sa realo, dilo tše nkego dikgapetla tša kgomarologa mahlong a Saulo, gomme a boela a bona. A emelela a kolobetšwa.

## Pušeletšo: Amose 9:11-12

<sup>11</sup>Morena o re: “Nako e etla yeo ka yona ke tlogo tsošološa mmušo wa Dafida wo o lego bjalo ka ntlo ye e welego. Ke tla thiba matlere a yona ka e tsošološa. Ke tla e aga ka lefsa ka dira gore e swane le kgale, <sup>12</sup>gore setšhaba sa Israele se thope naga ye e sa šetšego ya Edomo le ya ditšhaba tšohle tše se kilego sa di buša legatong la ka.” O realo, Morena, yo a tlogo phethagatša tše ka moka.

## LETŠATŠI LA BO 99

### Tshepo: Bakolose 1:27

<sup>27</sup>Maikemišetšo a Modimo e bile go utollela bakgethwa ba gagwe sephiri se se makatšago se a bego a tllilo se utollela baditšhaba. Sephiri sa gona ke gore Kriste o ka mo gare ga lena; ka yena le holofela gore le tla hwetša kabelo letagong la Modimo.

### Phodišo: Dipesalome 6:3-4

<sup>3</sup>Nna ke ikwa ke hlakahlakane e le ruri. Na o tla diega go fihlela neng, Morena?  
<sup>4</sup>Boa, o ntlhakodiše, Morena; etla o mphološe lehung ka leratorato la gago.

### Pušeletšo: Dipesalome 86:4-7

<sup>4</sup>Nthabiše, nna, mohlanka wa gago, gobane ke go hlolosetše kudu, Mong wa ka.  
<sup>5</sup>Wena, Mong wa ka, o yo botho, o wa go swarela; bohle ba ba go rapelago o ba rata kudu ka leratorato. <sup>6</sup>Hle, Morena, ntheeletše ge ke go rapela; nkele hloko ge ke go llela. <sup>7</sup>Ge ke le mathateng ke llela wena, ka gobane o a ntheeletša.

## LETŠATŠI LA BO 100

### Tshepo: Jesaya 55:10-11

<sup>10</sup>“Lentšu la ka le bjalo ka pula le lehlwa, tšona di nago di etšwa godimo. Ga di boele morago, di fela di thapiša lefase, di hlogiša dibjalo, tša medišetša balemi peu mme tša tlišetša batho dijo. <sup>11</sup>Ke ka moo lentšu le ke le bolelago le tlogo ba ka gona – lona le ka se palelwe ke go dira se ke ratago gore le se dire; gape le tla atlega go tše ke le romago gore le di dire.

### Phodišo: Mateu 14:34-35

<sup>34</sup>Ba tshela letsha ba fihla Genesarete <sup>35</sup>moo batho ba gona ba ilego ba lemoga gore ke Jesu. Ka gona ba roma batseta tikologong ka moka ya moo go yo botša batho gore ba tliše balwetši go Jesu.

## Pušeletšo: Joshua 21:43-45

<sup>43</sup>Ka fao Morena a neela Baisraele naga yela a bego a enetše borakgolokhukhu ba bona gore o tla ba fa yona. Ge ba e thopile, ba ile ba dula fao go yona. <sup>44</sup>Morena a ba khutšiša nageng ka moka, bjalo ka ge a be a enetše borakgolokhukhu ba bona. Ga go le o tee wa manaba a bona yo a ilego a ba kgona, ka gobane manaba ohle a bona Morena o be a a gafetše diatleng tša bona. <sup>45</sup>Morena o ile a phethagatša tšohle tše botse tše a di holofeditšego setšhaba sa Israele; gwa se ke gwa šala le se tee.